


無上菩提



大勢法師 講述  
(六)

# 自序

释大势

无上菩提即是梵语「阿耨多罗三藐三菩提」的简译，是菩萨的目标、诸佛所得，是一切众生本来具足的清净心性。

凡夫众生一念无明迷失本性，认己为物、分别人我，为欲造业轮回受苦。声闻法如药，声闻圣者如医师，能治众生心病，但不能治一切众生病。唯有得无上菩提的如来，具足一切佛法妙药，成大医王，得一切种智时，方能究竟医治十方三世一切众生，无量种种别异身心大病。

故「无上菩提」是相续「离苦得乐的妙法」，更广、大、深的菩提妙宝。菩萨发菩提大心甚为难得，久行菩萨道成就佛果，更是殊胜！

菩萨虽有三大类：信增上、悲增上、智增上，但成佛时，则是佛佛道同，无有别异。

本书以摩诃般若波罗蜜经为主，辅以大智度论、六度集经、

十住毗婆沙论、法华经、净土经论，其他经论等等编述，系统次第为：

- 1、以七种因缘故发无上菩提心。
- 2、为得无上菩提故大誓庄严，行六波罗蜜。
- 3、菩萨般若十地、发趣大乘、具足十地、乘于大乘、入法云地。
- 4、菩萨应知败坏退转因缘而守护之，成为不退转阿鞞跋致（不退转）。
- 5、菩萨应知菩提本性是何相貌，则不迷己为物，为物所转。
- 6、菩萨应常随大慈悲佛父学，供养如来，忆念本愿，大悲有情。

愿一切有情因读本书，乐求无上菩提殊妙功德，亲近诸佛，发菩提心，行菩萨道，净佛国土，成就众生，得无上菩提！

二〇一三年六月

序于南投妙有菩提园

# 目 录

般若波罗蜜的功德

.....

1

总结

.....

202



般若波罗蜜的功德

## 般若波罗蜜的功德

般若波罗蜜是诸佛母，父母之中，母功最重，

是故诸佛以般若为母，般舟三昧为父。

菩萨摩訶萨学般若波罗蜜，即能得诸功德及诸所愿。

是故菩萨应知般若波罗蜜的功德，应学般若波罗蜜，习行般若波罗蜜。

1、菩萨摩訶萨当习行般若波罗蜜：

A、菩萨摩訶萨欲徧知佛十力、四无所畏、四无碍智、十八不共法、大慈大悲，  
当习行般若波罗蜜。

B、菩萨摩訶萨欲具足道慧，当习行般若波罗蜜。

C、菩萨摩訶萨欲以道慧具足道种慧，当习行般若波罗蜜。

D、欲以道种慧具足一切智，当习行般若波罗蜜。

E、欲以一切智具足一切种智，当习行般若波罗蜜。

F、欲以一切种智断烦恼习，当习行般若波罗蜜。

菩萨摩訶萨应如是学般若波罗蜜。

2、菩萨摩訶萨欲上菩萨位，当学般若波罗蜜。

3、欲过声闻、辟支佛地、住阿惟越致地，当学般若波罗蜜。

4、菩萨摩訶萨欲住六神通，当学般若波罗蜜。

5、欲知一切众生意所趣向，当学般若波罗蜜。

6、菩萨摩訶萨欲胜一切声闻、辟支佛智慧，当学般若波罗蜜。

7、欲得诸陀罗尼门、诸三昧门，当学般若波罗蜜。

8、一切求声闻、辟支佛人布施时，欲以随喜心过其上者，当学般若波罗蜜。

9、一切求声闻、辟支佛人持戒时，欲以随喜心过其上者，当学般若波罗蜜。

10、一切求声闻、辟支佛人三昧、智慧、解脱、解脱知见，欲以随喜心过其上者，

当学般若波罗蜜。

11、一切求声闻、辟支佛人诸禅定、解脱、三昧，欲以随喜心过其上者，当学般若波罗

蜜。

12、菩萨摩訶萨行少施、少戒、少忍、少进、少禅、少智，欲以方便力回向故而得无量无边功德者，当学般若波罗蜜。

13、菩萨摩訶萨欲行檀那波罗蜜、尸罗波罗蜜、羼提波罗蜜、毘梨耶波罗蜜、禅那波罗蜜，当学般若波罗蜜。

14、菩萨摩訶萨欲使世世身体与佛相似，欲具足三十二相、八十随形好，当学般若波罗蜜。

15、欲生菩萨家、欲得童真地、欲得不离诸佛者，当学般若波罗蜜。

16、欲以诸善根供养诸佛，恭敬尊重赞叹随意成就，当学般若波罗蜜。

17、欲满一切众生所愿，饮食、衣服、卧具、涂香、车乘、房舍、床榻、灯烛等，当学般若波罗蜜。

18、菩萨摩訶萨欲使如恒河沙等国土众生，立于檀那波罗蜜，立于尸罗、羼提、毘梨耶、禅那、般若波罗蜜，当学般若波罗蜜。

19、欲植一善根于佛福田中，至得阿耨多罗三藐三菩提不尽者，当学般若波罗蜜。

20、菩萨摩訶萨欲令十方诸佛称赞其名，当学般若波罗蜜。

- 21、菩萨摩訶萨欲一发意到十方如恒河沙等诸佛国土，当学般若波罗蜜。
- 22、菩萨摩訶萨欲发一音使十方如恒河沙等诸佛国土闻声，当学般若波罗蜜。
- 23、菩萨欲使诸佛国土不断者，当学般若波罗蜜。
- 24、菩萨摩訶萨欲住内空、外空、内外空、空空、大空、第一义空、有为空、无为空、毕竟空、无始空、散空、性空、自相空、诸法空、不可得空、无法空、有法空、无法有法空，当学般若波罗蜜。
- 25、菩萨摩訶萨欲知诸法因缘、次第缘、缘缘、增上缘，当学般若波罗蜜。
- 26、菩萨摩訶萨欲知诸法如、法性、实际，当学般若波罗蜜。  
    菩萨摩訶萨应如是住般若波罗蜜。
- 27、菩萨摩訶萨欲数知三千大千国土中大地诸山微尘，当学般若波罗蜜。
- 28、菩萨摩訶萨析一毛为百分，欲以一分毛尽举三千大千国土中大海、江河、池泉诸水而不烧水性，当学般若波罗蜜。
- 29、三千大千国土中诸火一时皆燃，譬如劫尽烧时，菩萨摩訶萨欲一吹令灭者，  
    当学般若波罗蜜。

30、三千大千国土中诸大风起，欲吹破三千大千国土及诸须弥山如摧腐草，

菩萨摩訶萨欲以一指障其风力令不起者，当学般若波罗蜜。

31、菩萨摩訶萨欲一结跏趺坐遍满三千大千国土虚空，当学般若波罗蜜。

32、菩萨摩訶萨欲以一毛举三千大千国土中诸须弥山王，掷过他方无量阿僧祇诸佛国土

不烧众生，

33、欲以一食供养十方各如恒河沙等诸佛及僧，当学般若波罗蜜。

欲以一衣、花香瓔珞、末香涂香、烧香、灯烛、幢幡花盖等供养诸佛及僧，当学般

若波罗蜜。

34、菩萨摩訶萨欲使十方各如恒河沙等国土中众生，悉具于戒、三昧、智慧、解脱、解

脱知见，令得须陀洹果、斯陀含果、阿那含果、阿罗汉果，乃至令得无余涅槃，

当学般若波罗蜜。

35、菩萨摩訶萨行般若波罗蜜布施时，应如是分别：

如是布施得大果报，

如是布施得生刹利大姓、婆罗门大姓、居士大家，

如是布施得生四天王天处、三十三天、夜摩天、兜率陀天、化乐天、他化自在天，  
因是布施得人初禅、二禅、三禅、四禅、无边空处、无边识处、无所有处、非有  
想非无想处，

因是布施得生八圣道分，

因是布施能得须陀洹道乃至佛道，当学般若波罗蜜。

36、菩萨摩訶萨行般若波罗蜜布施时，以慧方便力故，能具足檀那波罗蜜、尸罗波罗蜜、

羼提波罗蜜、毘梨耶波罗蜜、禅那波罗蜜、般若波罗蜜。

菩萨摩訶萨云何布施时以慧方便力故，具足檀那波罗蜜乃至般若波罗蜜？

施人、受人、财物不可得故，能具足檀那波罗蜜；

罪、不罪不可得故，具足尸罗波罗蜜；

心不动故，具足羼提波罗蜜；

身心精进不懈怠故，具足毘梨耶波罗蜜；

不乱不味故，具足禅那波罗蜜；

知一切法不可得故，具足般若波罗蜜。

37、菩萨摩訶萨欲得过去、未来、现在诸佛功德，当学般若波罗蜜。

38、菩萨摩訶萨欲到有为、无为法彼岸，当学般若波罗蜜。

39、菩萨摩訶萨欲知过去、未来、现在诸法如、法相、无生际者，当学般若波罗蜜。

40、菩萨摩訶萨欲在一切声闻、辟支佛前，欲给侍诸佛，欲为诸佛内眷属，

欲得大眷属，欲得菩萨眷属，欲净报大施，当学般若波罗蜜。

41、菩萨摩訶萨欲不起慳心、破戒心、瞋恚心、懈怠心、乱心、痴心者，当学般若波罗蜜。

42、菩萨摩訶萨欲使一切众生立于布施福处、持戒福处、修定福处、劝导福处，

欲令众生立于财福、法福者，当学般若波罗蜜。

43、菩萨摩訶萨欲得五眼，当学般若波罗蜜。

何等五眼？肉眼、天眼、慧眼、法眼、佛眼。

44、菩萨摩訶萨欲以天眼见十方如恒河沙等国土中诸佛，

欲以天耳闻十方诸佛所说法，

欲知诸佛心，当学般若波罗蜜。

- 45、欲闻十方诸佛所说法，闻已乃至阿耨多罗三藐三菩提不忘者，当学般若波罗蜜。
- 46、菩萨摩訶萨欲见过去、未来诸佛国土及见现在十方诸佛国土，当学般若波罗蜜。
- 47、菩萨摩訶萨欲闻十方诸佛所说十二部经——修多罗、祇夜、受记经、伽陀、忧陀那、因缘经、阿波陀那、如是语经、本生经、方广经、未曾有经、论议经，诸声闻等、闻与不闻，尽欲诵受持者，当学般若波罗蜜。
- 48、十方如恒河沙等世界中，诸佛所说法，已说、今说、当说，闻已欲一切信持，自行亦为他人说，当学般若波罗蜜。
- 49、菩萨摩訶萨，过去诸佛已说、未来诸佛当说，欲闻，闻已自利亦利他人，当学般若波罗蜜。
- 50、十方如恒河沙等诸世界中间暗处，日月所不照处，欲持光明普照者，当学般若波罗蜜。
- 51、十方如恒河沙等世界中，无有佛名、法名、僧名，欲使一切众生皆得正见、闻三宝名者，当学般若波罗蜜。
- 52、菩萨摩訶萨欲令十方如恒河沙等诸世界中众生，以我力故，盲者得视、聋者得听、

狂者得念、裸者得衣、饥渴者得饱满，当学般若波罗蜜。

53、菩萨摩訶萨若欲令十方如恒河沙等世界中众生诸在三恶趣者，以我力故皆得人身，当学般若波罗蜜。

54、欲令十方如恒河沙等世界中众生，以我力故，立于戒、三昧、智慧、解脱、解脱知见，令得须陀洹果乃至阿耨多罗三藐三菩提，当学般若波罗蜜。

55、菩萨摩訶萨欲学诸佛威仪者，当学般若波罗蜜。

56、菩萨摩訶萨欲得如象王视观，当学般若波罗蜜。

57、菩萨作是愿：使我行时离地四指、足不蹈地，我当共四天王天乃至阿迦尼吒

天无量千万亿诸天众，围绕恭敬至菩提树下。当学般若波罗蜜。

58、我当于菩提树下坐，四天王天乃至阿迦尼吒天，以天衣为座。当学般若波罗蜜。

59、我得阿耨多罗三藐三菩提时，行住坐卧处，欲使悉为金刚。当学般若波罗蜜。

60、菩萨摩訶萨欲出家日即成阿耨多罗三藐三菩提，

即是日转法轮，转法轮时，无量阿僧祇众生远尘离垢，诸法中得法眼净，无量阿僧祇众生一切法不受故，诸漏心得解脱，

无量阿僧祇众生于阿耨多罗三藐三菩提得不退转，当学般若波罗蜜。

61、我得阿耨多罗三藐三菩提时，以无量阿僧祇声闻为僧，

我一说法时便于座上尽得阿罗汉，当学般若波罗蜜。

62、我当以无量阿僧祇菩萨摩訶萨为僧，

我一说法时，无量阿僧祇菩萨皆得阿惟越致，

63、欲得寿命无量、光明具足，当学般若波罗蜜。

64、我成阿耨多罗三藐三菩提时，世界中无淫欲、瞋恚、愚痴，亦无三毒之名，一切众

生成就如智慧善、施善、戒善、定善、梵行善、不烧众生，当学般若波罗蜜。

65、使我般涅槃后，法无灭尽，亦无灭尽之名，当学般若波罗蜜。

66、我得阿耨多罗三藐三菩提时，十方如恒河沙等世界中众生闻我名者，必得阿耨多罗

三藐三菩提。欲得如是等功德者，当学般若波罗蜜。

一、菩萨摩訶萨欲徧知佛十力、四无所畏、四无碍智、十八不共法、大慈大悲，

当习行般若波罗蜜。

A、十力、四无所畏、四无碍智、十八不共法（请参阅无上菩提第一册）

1、大慈：从大人心中生，十力、四无所畏、四无碍智、十八不共法，

大法中出，能破三恶道大苦，能与三种大乐：天乐，人乐，涅槃乐。

是大慈徧满十方三世众生，乃至昆虫，慈彻骨髓，心不舍离。

若三千大千世界众生堕三恶道，若人一一皆代受其苦，得脱苦已，以五欲乐、

禅定乐、世间最上乐，自恣与之，皆令满足；

比佛慈悲，千万分中不及一分。以世间乐欺诳不实，不离生死故。

2、法在佛心中，一切皆大，何故但说慈、悲为大？

佛所有功德法皆大，故慈、悲亦大。

3、慈、悲，是佛道之根本，说慈、悲为大。所以者何？

菩萨见众生老、病、死苦，身苦、心苦，今世、后世苦等诸苦所恼，生大慈悲，

为救如是大苦，故发心求阿耨多罗三藐三菩提；

亦以大慈悲力故，于无量阿僧祇世生死中，心不厌没；以大慈悲力故，久应得涅槃

而不取证。

以是故，一切诸佛法中，慈、悲为大；若无大慈、大悲，便早入涅槃。

4、得佛道时，成就无量甚深禅定、解脱、诸三昧，生清净乐，弃舍不受；入聚落城邑中，种种譬喻、因缘说法；变化其身，无量音声，将迎一切，忍诸众生骂詈诽谤，乃至自作伎乐，皆是大慈、大悲力。

5、大慈、大悲：

大名非佛所作，乃是众生称名赞誉；

譬如师子大力，不自言力大，皆是众兽所名。

众生闻佛种种妙法，知佛为佑利众生故，于无量阿僧祇劫难行能行；

众生闻见是事，而名此法为大慈、大悲。

譬如一人，有二亲友，以罪事因缘故，系于监狱。

一人供给所须，一人代死；众人言：能代死者，是为大慈悲。

佛亦如是，世世为一切众生，头目髓脑，尽以布施，众生闻见是事，即共名之为大慈、大悲。

例：尸毘王，为救鸽故，以全身肉代替，仍不与鸽齐等，再以手攀称，欲以身代，

是时地为六种震动，海水波荡，诸天香华供养于王。

众生称言：为一小鸟，所感如此，真是大慈、大悲！

佛因众生所名，故言大慈、大悲。

6、禅定等诸余功德，人不易知，故不名为大；

佛智慧说法等，能令人得道，智慧、得道、所能，无有偏知者，

a、大慈、大悲故，世世不惜身命，舍禅定乐，救护众生，人皆知之。

b、于佛智慧，可比类推论得知，不能了了分别知；

a、慈悲心，眼见、耳闻，处处变化大师子吼，是故可知。

b、佛智慧细妙，诸菩萨、舍利弗等尚不能知，何况余人！

a、慈悲相可眼见、耳闻故，人能信受；智慧深妙，不可测知。

是大慈、大悲，一切众生所爱乐；譬如美药，人所乐服。

b、智慧如服苦药，人多不乐；

a、人多乐故，称慈悲为大。

b、智慧者，得道人乃能信受；

a、大慈悲相，一切杂类皆能生信。

如见像，若闻说，皆能信受，多所饶益，故名为大慈、大悲。

b、大智慧名舍相、远离相；

a、大慈大悲为怜愍利益相。

是怜愍利益法，一切众生所爱乐；以是故名为大。

7、大慈大悲名为一切佛法之根本，

佛得无碍解脱智故，一切诸法皆清静，一切烦恼及习尽。

声闻、辟支佛，不得无碍解脱智，故烦恼习不尽。

8、诸佛力势不可思议，

诸声闻、辟支佛不能离众生想而生慈悲；

诸佛能离众生想而生慈悲。所以者何？

如诸阿罗汉、辟支佛，十方众生相不可得，而取众生相生慈悲；

今诸佛十方求众生不可得，亦不取众生相而能生慈悲。

9、有三种慈悲：众生缘、法缘、无缘。

一切众生中，唯佛尽行不诳法；

若佛于众生中取相而行慈悲心，不名行不诳法。何以故？众生毕竟不可得故。

声闻、辟支佛，不名为尽行不诳法；

故声闻、辟支佛，于众生、于法，若取相，若不取相，不悉行不诳法故。

B、菩萨摩訶萨欲得道慧，当习行般若波罗蜜。

C、菩萨摩訶萨欲以道慧具足道种慧，当习行般若波罗蜜。

1、道名一道，一向趣涅槃，于善法中一心不放逸，道随身念。

2、道有二道：恶道、善道；世间道、出世间道；定道、慧道；有漏道、无漏道；

见道、修道；学道、无学道；信行道、法行道；向道、果道；

无碍道、解脱道；信解道、见得道；慧解脱道、俱解脱道。

如是无量二道门。

3、有三道：地狱道，畜生道，饿鬼道。

三种地狱：热地狱，寒地狱，黑暗地狱。

三种畜生道：地行，水行，空行。

三种鬼道：饿鬼，食不净鬼，神鬼。

三种善道：人道，天道，涅槃道。

人有三种：作罪者，作福者，求涅槃者。

有三种人：受欲行恶者，受欲不行恶者，不受欲不行恶者。

天有三种：欲天，色天，无色天。

涅槃道有三种：声闻道，辟支佛道，佛道。

声闻道有三种：学道，无学道，非学非无学道。

辟支佛道，亦如是。

佛道有三种：波罗蜜道，方便道，净世界道。

佛复有三道：初发意道，行诸善道，成就众生道。

复有三道：戒道，定道，慧道。

如是等无量三道门。

4、有四种道：凡夫道，声闻道，辟支佛道，佛道。

有四种道：声闻道，辟支佛道，菩萨道，佛道。

声闻道有四种：苦道，集道，灭道，道道。

有四沙门果道。

复有四种道：观身实相道，观受、心、法实相道。

有四种道：为断未生恶不善令不生道，为断已生恶令疾灭道，

为未生善法令生道，为已生善法令增长道。

有四种道：欲增上道，精进增上道，心增上道，慧增上道。

有四圣种道：不择衣食、卧具、医药，乐断苦修定。

有四行道：苦难道，苦易道，乐难道，乐易道。

有四修道：一、为今世乐修道，二、生死智修道，三、为漏尽故修道，

四、分别慧修道。

有四天道，所谓四禅。

有四种道：天道，梵道，圣道，佛道。

如是等无量四道门。

5、有五种道：地狱道，畜生，饿鬼，人，天道。

有五无学众道：无学戒众道，乃至无学解脱知见众道。

有五种净居天道；

有五道：凡夫道，声闻道，辟支佛道，菩萨道，佛道。

有五道：分别色法道，分别心法道，分别心数道，分别心不相应行道，分别无为法道。

有五种道：苦谛所断道，集谛所断道，灭谛所断道，道谛所断道，思惟所断道。如是等无量五法道门。

6、有六种道：地狱道，畜生，饿鬼，人，天，阿修罗道。

有舍六尘道；六神信道；六波罗蜜道；一一波罗蜜各各有六道。

如是等无量六道门。

7、有七道：七觉意道；如是等无量七道门。

8、有八道：八正道；八解脱道；八背舍道。如是等无量八道门。

9、有九道：九次第道；九阿罗汉道；

九菩萨道，所谓六波罗蜜、方便、成就众生、净佛世界。

如是等无量九道门。

10、有十道，所谓十无学道、十想道、十智道、十一切处道、十不善道、十善道。

乃至一百六十二道。

如是等无量道门。

a、如是诸道，尽知、遍知，是为道种慧。

b、般若波罗蜜是菩萨第一道，一相、所谓无相，

是种种道，皆入一道中，所谓诸法实相，初学有种种别，后皆同一，无有差别。譬

如劫尽烧时，一切所有，皆同虚空。

c、菩萨住一相无相中，为引导众生故，分别说是种种道，所谓世间道、出世间道等。

d、世间名，但从颠倒忆想、虚诞二法生，如幻、如梦、如转火轮，凡夫人强以为世间；

是世间皆从虚妄中来，今亦虚妄、本亦虚妄；其实无生无作，但从内外：六情、六

尘和合因缘生。随凡夫所着故，为说世间；是世间种种邪见罗网，如乱系相着，常

往来生死中；如是知世间。

e、何等是出世间道？如实知世间，即是出世间道。所以者何？

智者求世间、出世间，二事不可得；若不可得，当知假名为世间、出世间。

f、但为破世间故，说出世间，世间相即是出世间，更无所复有。所以者何？

世间相不可得，是出世间；是世间相常空，世间法定相不可得故。

h、如是行者不得世间，亦不着出世间。

若不得世间，亦不着出世间，爱、慢破故，不共世间净。何以故？

行者久知世间空无所有，虚诳故，不作忆想分别。

i、世间名五众，五众相，假令十方诸佛求之亦不可得：无来处，无住处，亦无去处；

若不得五众来、住、去相，即是出世间。

j、行者尔时观是世间、出世间，实不可见；

不见世间与出世间合，亦不见出世间与世间合；

离世间亦不见出世间，离出世间亦不见世间；

如是则不生二识，所谓世间、出世间。

若舍世间，不受出世间，是名出世间。

k、若菩萨能如是知，则能为众生分别世间、出世间道；有漏、无漏一切诸道，亦如是入一相，是名道种慧。

D、欲以道种慧具足一切智，当习行般若波罗蜜。

E、欲以一切智具足一切种智，当习行般若波罗蜜。

一切智、一切种智，有何差别？

1、无差别；或时言一切智，或时言一切种智。

2、说有差别

a、总相是一切智，别相是一切种智。

b、因是一切智，果是一切种智。

c、略说一切智，广说一切种智。

d、一切智者，总破一切法中无明暗；一切种智者，观种种法门破诸无明。

e、一切智，譬如说四谛；一切种智，譬如说四谛义。

f、一切智者，如说苦谛；一切种智者，如说八苦相。

g、一切智者，如说生苦；一切种智者，如说种种众生处处受生。

h、一切法名眼色乃至意法，是诸阿罗汉、辟支佛亦能总相知无常、苦、空、无我等；知是十二人故，名为一切智。

声闻、辟支佛尚不能尽别相知一众生生处、好丑、事业多少；未来、现在世亦如是，何况尽知一切众生？

如一阎浮提中金名字，尚不能知，何况三千大千世界，于一物中种种名字？

若天语，若龙语，如是等种种语言名金，尚不能知，何况能知金因缘生处、好恶、贵贱，因而得福，因而得罪，因而得道！

如是现事尚不能知，何况心心数法，所谓禅定、智慧等诸法！

i、佛尽知诸法总相、别相故，名为一切种智。

j、一切智是声闻、辟支佛事；道智是诸菩萨事；一切种智是佛事。

k、声闻、辟支佛但有总一切智，无有一切种智。

声闻、辟支佛虽于别相有分而不能尽知，故总相受名；

佛一切智、一切种智，皆是真实。

1、声闻、辟支佛但有名字一切智；譬如昼灯，但有灯名，无有灯用。

如声闻、辟支佛，若有人问难，或时不能悉答、不能断疑；

如佛三问舍利弗而不能答；若有一切智，云何不能答？

以是故，但有一切智名，胜于凡夫，仍无有实。

是故佛是实一切智、一切种智。

有如是无量名字，或时名佛为一切智人，或时名为一切种智人。

如是等略说一切智、一切种智种种差别。

3、菩萨行六波罗蜜，三十七品、十力、四无所畏等诸法，得一切智。

何故说但用道种智得一切智？

a、六波罗蜜等即是道，知是道、行是道，得一切智，

初心乃至坐道场，于其中间一切善法，尽名为道。

此道中分别思惟而行，是名道智；如经说：道智是菩萨事。

b、佛道事已备故，不名道智；

c、阿罗汉、辟支佛道，自于所行已办，于佛功德未具备，是故不名道智，道是行相故。

d、佛道大故，名为道智；声闻、辟支佛道小故，不名道智。

菩萨摩訶萨自行道，亦示众生各各所行道，故说名菩萨行道智，得一切智。

4、何等是一切智所知一切法？

何等是一切法？

a、所谓眼色、耳声、鼻香、舌味、身触、意法。是十二入名一切法。

b、一切法，所谓名、色。

如佛说偈：若欲求真观，但有名与色；若欲审实知，亦当知名色。

虽痴心多想，分别于诸法，更无有异事，出于名色者。

c、一切法，所谓色、无色法，可见、不可见，有对、无对，有漏、无漏，有为、无为，

心、非心，心相应、非心相应，共心生、不共心生，随心行、不随心

行，从心因、不从心因；如是等无量二法门摄一切法。

d、一切法，所谓善法，不善法，无记法；见谛所断，思惟所断，不断法；有报法，无

报法，非有报非无报法；如是等无量三法门摄一切法。

e、一切法，所谓过去法，未来法，现在法，非过去、未来、现在法；欲界系法，色界

系法，无色界系法，不系法；从善因法，从不善因法，从无记因法，从非善非不善非无记因法；有缘缘法，无缘缘法，有缘缘亦无缘缘法，非有缘缘非无缘缘法；如是等无量四法门摄一切法。

f、一切法，所谓色法，心法，心数法，心不相应诸行法，无为法；四谛及无记无为；如是等无量五法门摄一切法。

g、一切法，所谓五众及无为；

苦谛所断法，集谛、灭谛、道谛、思惟所断法，不断法；如是等无量六法门摄一切法。

h、七、八、九、十等诸法门。

i、一切法，所谓有法、无法，空法、实法，所缘法、能缘法，聚法、散法等。

一切法，所谓有法、无法，亦有亦无法；空法、实法，非空非实法；所缘法、能缘法，非所缘非能缘法。

j、一切法，所谓有法，无法，亦有亦无法，非有非无法；空法，不空法，空不空法，非空非不空法；生法，灭法，生灭法，非生非灭法；不生不灭法，非

不生非不灭法，不生不灭亦非不生非不灭法，非不生非不灭亦非不生亦非不灭法。

k、一切法，所谓有法，无法，有无法，非有非无法；舍是四句法。

空、不空，生、灭，不生、不灭。五句皆亦如是。

如是等种种无量阿僧祇法门所摄诸法，以是无碍智慧尽遍知上诸法，名为一切智、一切种智。

5、一切众生皆求智慧，云何独佛一人得一切智？

佛于一切众生中第一故，独得一切智。

如佛所说：无足、二足，四足、多足，有色、无色，有想、无想，非有想非无想等，一切众生中，佛最第一。

譬如须弥山，于众山中自然最第一；如四大中，火最有力，能照能烧。

佛亦如是，于一切众生中最第一故，得一切智。

6、何以故佛于一切众生中独最第一，

a、以得一切智故。

b、佛自利益亦利益他故，于众生中最第一。

如一切照中日为第一，一切人中转轮圣王最第一，一切香中牛头栴檀为第一，一切珠中如意珠为第一，一切诸戒中圣戒为第一，一切清净中解脱为第一，一切解脱中不坏解脱为最第一，一切诸谛中空观为第一，一切诸法中涅槃为第一，如是等无量各各第一。

佛亦如是，于一切众生中最为第一故，独得一切智。

c、佛从初发意，以大誓庄严，一切衰没众生欲拯济故，尽徧行诸善道，无善不集，无苦不行，皆集一切诸佛功德；

如是等种种无量因缘故，佛于一切众生中独第一。

除诸佛，为余众生故，言佛独第一。

d、佛知是一切法一相、异相，漏相、非漏相，作相、非作相等，

一切法各各相、各各力、各各因缘、各各果报、各各性、各各得、各各失；一切智慧力故，一切世一切种尽徧解知。

故说：欲以道种智具足得一切智，当习行般若波罗蜜。

e、佛得佛道时，以道智得具足一切智、一切种智；

何以言：以一切智得具足一切种智？

佛得道时，以道智虽具足得一切智、得具足一切种智，而未用一切种智；

如大国王得位时，境土宝藏皆已得，但未开用。

F、欲以一切种智断烦恼习，当习行般若波罗蜜。

一心中得一切智、一切种智，断一切烦恼习；

云何言：以一切智具足得一切种智，以一切种智断烦恼习。

1、实一切一时得；为令人信般若波罗蜜故，欲令众生得清净心，是故如是说。

2、虽一心中得，亦有初、中、后次第。

如一心有三相，生因缘住，住因缘灭。

又如心数法，不相应诸行，及身业、口业。

以道智具足一切智，以一切智具足一切种智，以一切种智断烦恼习亦如是。

3、先说一切种智，即是一切智。

道智，名金剛三昧；

佛初心即是一切智、一切种智，是时烦恼习断。

4、断一切烦恼习者，

a、烦恼名略说则三毒，广说则三界九十八使，是名烦恼。

b、烦恼习名烦恼残气，若身业、口业不随智慧，似从烦恼起；

不知他心者，见其所起，生不净心，是非实烦恼，久习烦恼故，起如是业。

譬如久锁脚人，卒得解脱，行时虽无有锁，犹有习在。

如乳母衣，久故垢着，虽以淳灰净浣，虽无有垢，垢气犹在；

衣如圣人心，垢如诸烦恼，虽以智慧水浣，烦恼垢气犹在。

如是诸余贤圣虽能断烦恼，不能断习。

1如难陀淫欲习故，虽得阿罗汉道，于男女大众中坐，眼先视女众，而与言语说法。

2如舍利弗瞋习故，闻佛言舍利弗食不净食，即便吐食，终不再受请。

又舍利弗自说偈言：覆罪妄念人，无智而懈怠，终不欲令此，妄来近我住！

3如摩诃迦叶瞋习故，佛灭度后集法时，敕令阿难六突吉罗忏悔，而复自牵

阿难手出：不共你漏未尽不净人集法。

4 如毕陵迦婆蹉，常骂恒神为小婢。

5 如摩头婆和陀跳戏习故，或时从衣枷蹕上梁，从梁至枰，从枰至阁。

6 如僇梵钵提牛业习故，常吐食而齧。

如是等诸圣人，虽漏尽而有烦恼习；

如火焚薪已，火力薄故，不能令尽，故灰炭犹在。

C、若劫尽时火，烧三千大千世界无复遗余，火力大故；

佛一切智火亦如是，烧诸烦恼，无复残习。

1 如一婆罗门，以五百种恶口，众中骂佛，佛无异色，亦无异心；

婆罗门心伏，以五百种语赞佛，佛无喜色，亦无悦心；于此毁誉，心色无变。

2 又旃遮婆罗门女，带杆谤佛，佛无惭色；事情既露，佛无悦色。

转法轮时，赞美声满于十方，心亦不高；孙陀利死，恶声流布，心亦不下。

3 阿罗毘国土风寒，又多蒺藜，佛于中坐卧，不以为苦；

在天上欢喜园中，夏安居时，坐剑婆石，柔软清洁，如天蜿蜒，不以为乐。

4 受天王奉天食，不以为美；毘兰若国食马麦，不以为恶。

5 诸大国王供奉上饌，不以为得；入萨罗聚落，空钵而出，不以为失。

6 提婆达多于耆闍崛山，推石压佛，佛亦不憎；罗睺罗敬心赞佛，佛亦不爱。

7 阿阇世纵诸醉象，欲令害佛，佛亦不畏；

降伏狂象，王舍城人益加恭敬，持香华缨络出供养佛，佛亦不喜。

8 九十六种外道，一时和合议言，我等亦皆是一切智人；从舍婆提来，欲共佛论议，

佛以神足从脐放光，光中皆有化佛；

国王波斯匿亦命外道令来，于其坐上尚不能得动，何况能与佛论议？

9 佛见一切外道贼来，心亦无退；

破是外道，诸天世人倍益恭敬供养，心亦不进。

如是等种种因缘来欲毁佛，佛不可动；

譬如真阎浮檀金，火烧不异，槌打磨斫，不败不异。

佛亦如是，经诸毁辱诽谤论议，不动不异。

故知佛诸烦恼习都尽无余。

5、为何诸阿罗汉、辟支佛同用无漏智，断诸烦恼；但断不尽烦恼习？

a、诸阿罗汉、辟支佛智慧力薄，如世间火；诸佛智慧力大，如劫尽火。

b、声闻、辟支佛集诸功德、智慧不久，或一世、二世、三世；

佛智慧、功德，于无量阿僧祇劫广修广习，善法久熏故，于烦恼习无复余气。

c、佛于一切诸功德皆已摄尽故，乃至诸烦恼习气永尽无余。何以故？

诸善法功德消诸烦恼故。

诸阿罗汉于此功德不尽得故，但断世间爱，直入涅槃。

d、佛断结使智慧力甚利，用十力为大刀，以无碍智直过故，断诸结使尽、无复遗余。

譬如人有重罪，国王大瞋，诛其七世根本，令无遗余；

佛亦如是，于烦恼重贼，诛拔根本，令无遗余。

故说：欲以一切种智断一切烦恼习，当习行般若波罗蜜。

6、菩萨得无生法忍，

a、烦恼已尽；习气未除故，

b、因习气受，及法性生身，能自在化生。

c、有大慈悲为众生故，

d、亦为满本愿故，

e、还来世间具足成就余残佛法故；

十地满，坐道场，以无碍解脱力故，得一切智、一切种智，断烦恼习。

7、菩萨得无生法忍时，断烦恼，舍生身、得法性生身。

菩萨得佛时，断烦恼习。

二、菩萨摩訶萨欲上菩萨位，当学般若波罗蜜。

1、菩萨位者，无生法忍是。

得此法忍，观一切世间空，心无所着，住诸法实相中，不复染世间。

2、般舟般三昧，是菩萨位。

得是般舟般三昧，悉见现在十方诸佛，从诸佛闻法，断诸疑网；是时菩萨心不动摇，是名菩萨位。

3、菩萨位者，具足六波罗蜜，生方便智，于诸法实相亦不住；自知自证，不随他语，

若魔作佛形来，心亦不惑。

4、入菩萨法位力故，得名阿鞞跋致菩萨。

5、菩萨摩訶萨入是法位中，不复堕凡夫数，名为得道人：一切世间事欲坏其心，不能令动；闭三恶趣门，堕诸菩萨数中，初生菩萨家，智慧清净成熟。

6、住顶不堕，是名菩萨法位。

上位菩萨不堕恶趣；不生下贱家；不堕声闻、辟支佛地；亦不从顶堕。

a、云何为「顶堕」？

若菩萨摩訶萨无方便心行六波罗蜜，入空、无相、无作中，不能上菩萨位；亦不堕声闻、辟支佛地；爱着诸功德法；于五蕴无常、苦、空、无我取相心着，言：是道、是非道，是应行、是不应行；如是等取相分别，是菩萨顶堕。

b、何等是「住顶」？

如上所说诸法爱断，于爱断法亦复不取。

若菩萨摩訶萨行般若波罗蜜时，内空中不见外空，外空中不见内空，外空中不见内外空，内外空中不见外空，乃至无法有法空，亦如是。

7、上位菩萨得无等等心，亦不自高，知心相真空，诸有无等戏论灭。

8、学声闻人无大慈悲心、智慧不利故，未生厌心，多求诸法，生种种邪见疑悔；

菩萨摩訶萨大慈愍一切故，多求度脱众生老、病、死苦，不求分别种种戏论。

譬如长者有一子，爱之甚重，其子得病，但求良药能愈病者，不求分别诸药名字，

取之时节，合和比例。

以是故，诸菩萨从果观十二因缘，不从因观；见多者从因观，爱多者从果观。

诸声闻人因邪位故有正位；

菩萨邪位薄故，但名菩萨位。

9、从得何法，名为菩萨位？

从发意、修行、大悲、方便具足，行是四法，得入菩萨位。

声闻法，从具四善根：暖法、顶法、忍法、世间第一法后，入苦法忍正位。

a、初发意虽有修行，不久修故，不名修行；如在家虽终日不住，不名为行。

发意时，但有意愿；

b、行时造作，以财与人，受持禁戒，如是等行六波罗蜜，是名修行。

c、修行已，以般若波罗蜜知诸法实相，以大悲心愍念：众生不知是诸法实相，染着世间虚诳法，受种种身苦、心苦。故不名修行，得受「大悲」名。

d、方便者，具足般若波罗蜜故，知诸法空；大悲心故，怜悯众生；于是二法，以方便力不生染着。

虽知诸法空；方便力故，亦不舍众生；虽不舍众生，亦知诸法实空。

若于是二事等，即得人菩萨位。

如声闻人，于定慧二法等故，是时即得人正位。

e、是法虽有行，更有余名字，不名修行。

从初发意乃至坐道场，于其中间所行皆名修行，小小差别，有异名字，为易解故。

1 譬如有人初发阿耨多罗三藐三菩提意，欲度脱一切众生老、病、死等身心诸苦，作大誓庄严；

2 功德、慧明二事因缘故，所愿皆满。是二事有六分修行，名为六波罗蜜：布施、持戒、忍辱是功德分；精进、禅定、智慧是慧明分。

3 修行六波罗蜜，知是诸法相甚深微妙，难解难知，作是念：

众生着三界诸法，以何因缘令众生得是诸法相？

当以具足诸功德，清静智慧，

成就佛身三十二相，八十随形好，光明具足，神通无量；

以十力、四无所畏、十八不共法、四无碍智，观应可度者，说法开化。

譬如金翅鸟王，普观诸龙，命应尽者，以翅抔海，令水两辟，取而食之。

4 佛亦如是，以佛眼观十方世界五道众生，谁应得度，初现神足，次为示其心趣；

以此二事，除三障碍而为说法，拔三界众生。

得佛力无量神通，假令虚妄犹尚可信，何况实说！是名方便。

5 菩萨以般若波罗蜜知诸法相，念其本愿，欲度众生，

作是思惟：诸法实相中，众生不可得，当云何度？

复作是念：诸法实相中，众生虽不可得，而众生不知是诸法相故，欲令知是实相。

是实法相，亦不碍众生。

实法相者，名为无所除坏，亦无所作。是名方便。

具足是四法，得人菩萨位。

三、欲过声闻、辟支佛地，住阿鞞跋致地，当学般若波罗蜜。

1、菩萨入法位时，即是过声闻、辟支佛地，住阿鞞跋致地。

2、菩萨初发意时，所可怖畏，无过声闻、辟支佛地。

正使堕地狱，无如是怖畏，不永破大乘道故；

阿罗汉、辟支佛于此大乘，以为永灭。

譬如空地有树，名舍摩梨，觚枝广大，众鸟集宿。

一鸽后至，住一枝上，其枝及觚，即时压折。

泽神问树神：大鸟鸚鷖，皆能任持，何至小鸟，便不自胜？

树神答言：此鸟从我怨家尼俱卢树上来，食彼树果，来栖我上，必当放粪；子堕地

者，恶树复生，为害必大。以是故，于此一鸽，大怀忧畏；宁舍一枝，

所全者大。

菩萨摩訶萨亦如是，于诸外道、魔众，及诸结使、恶业，无如是畏如阿罗汉、辟支佛。何以故？

声闻、辟支佛于菩萨边，亦如彼鸽，坏败大乘心，永灭佛业。

以是故，但说过声闻、辟支佛地。

3、住阿鞞跋致地者，

从初发意已来，常喜乐住阿鞞跋致地，闻诸菩萨多退转故，发意时作愿：何时当得过声闻、辟支佛地，住阿鞞跋致地？以是故，说住阿鞞跋致地。

4、何等是阿鞞跋致地？

a、若菩萨能观一切法不生不灭、不生不生不灭，不共、非不共。

如是观诸法，于三界得脱，不以空，不以非空；

一心信忍十方诸佛所用实相智慧，无能坏、无能动者，是名无生忍法。

无生忍法，即是阿鞞跋致地。

b、入菩萨位，是阿鞞跋致地；过声闻、辟支佛地，亦名阿鞞跋致地。

c、住阿鞞跋致地，世世常得果报神通，不失不退。

d、若菩萨得此二法：虽得诸法实相，而以大悲不舍一切众生。

复有二法：一者、清净智慧；二者、方便慧。

复有二法：一者、深心念涅槃；二者、所作不离世间。

譬如大龙，尾在大海，头在虚空，震电雷霆而降大雨。

e、阿鞞跋致菩萨得是诸法实相智慧，世世不失，终不暂离。

于诸佛深经终不疑，亦不作碍。何以故？

我未得一切智慧故，不知何方便、何因缘故如是说。

f、阿鞞跋致菩萨常以深心，终不生恶；

阿鞞跋致以深心集诸善，浅心作诸不善。

g、若阿鞞跋致相，得无生法忍，云何以浅心作诸不善？

有二种阿鞞跋致：

一者、得无生忍法；

二者、虽未得无生忍法，佛知其过去、未来所作因缘，必得作佛，为利益傍人故，

为其授记。

是菩萨生死肉身，结使未断，于诸凡夫中为最第一，是亦名阿鞞跋致相。

若得无生忍法，断诸结使，此则清净，末后肉身尽，得法性生身，结使所不碍，不须教诫；如大恒河中船，不须将御，自至大海。

h、有初发意生大心，断诸烦恼，知诸法实相，便得阿鞞跋致。

i、有但行檀波罗蜜，便具足六波罗蜜；乃至般若波罗蜜亦如是。

j、有行六波罗蜜，未得阿鞞跋致，于众生中生大悲心，是时便得阿鞞跋致。

k、有得悲心而作是念：「若诸法皆空，则无众生，谁可度者？」是时悲心便弱；

或时以众生可愍，于诸法空观弱。

若得方便力，于此二法，等无偏党；

大悲心不妨诸法实相，得诸法实相不妨大悲心。

如是方便，是时便得人菩萨法位，住阿鞞跋致地。

四、菩萨摩訶萨欲住六神通，当学般若波罗蜜。

1、诸菩萨皆得五神通，今欲住六神通是佛所得；

第六漏尽神通有二种：一者漏、习俱尽，二者漏尽而习不尽。

a、习不尽，故言「皆得五通」；

b、漏尽，故言「住六神通」。

2、若菩萨漏尽，云何复生？云何受生？

a、一切受生皆由爱相续故有，譬如米虽得良田，时泽终不能生。

b、诸圣人爱糠已脱故，虽有有漏业生因缘，不应得生。

菩萨入法位住阿鞞跋致地，末后肉身尽，得法性生身；

虽断诸烦恼，有烦恼习因缘故，受法性生身，非三界生。

c、阿罗汉烦恼已尽，习亦未尽，何以不生？

阿罗汉无大悲，无本誓愿度一切众生；又以实际作证，已离生死故。

d、学神通有何次第？

菩萨摩訶萨作是念：离五欲，得诸禅，有慈悲故，为众生取神通，现诸希有奇特之事，令众生心清净。何以故？若无希有事，不能令多众生得度。

1系心身中虚空，灭粗重色相，常取空轻相，发大欲精进心，智慧筹量心力能举身。未筹量已，自知心力大能举其身，譬如学趋；常坏色粗重相，常修轻空相，是时便能飞。

2亦能变化诸物，令地作水、水作地、风作火、火作风，如是诸大皆令转易。

令金作瓦砾、瓦砾作金，如是诸物各能令化。

变地是水相，常修念水令多，不复忆念地相，是时地相如念即作水，如是等诸物皆能变化。

3 诸贤圣神通，于六尘中随意自在，

见好能生厌想，见丑能生乐想，亦能离好丑想行舍心。

是名三种神通。此自在神通唯佛具足。

3、菩萨得神通次第：

佛如所自得，为人说次第。

佛初夜分得一通一明，所谓如意通、宿命明；

中夜分得天耳通、天眼明；

后夜分得知他心智通、漏尽明。通、明次第得。

初夜时，魔王来欲与佛战，菩萨以神通力种种变化，令魔兵器皆为瓔珞。

降魔已续念：「神通欲令具足」，生心即入，便得具足神通。

降魔已自念：「一身云何得大力？」便求宿命明，自知世世积福德力故。

中夜时，魔即还去寂寞无声，慈愍一切故，念魔众声，生天耳神通及天眼明；用是天耳闻十方五道众生苦乐声，闻声已欲见其形，而以障蔽不见，故求天眼。后夜时，既见众生形，欲知其心，故求他心智。

知众生心皆欲离苦求乐，是故菩萨求漏尽神通，于诸乐中漏尽最胜，令众生得。

4、有二种菩萨：

一者、法性生身菩萨；

二者、为度众生故，方便受人法，身生净饭王家，出四城门，问老、病、死人，是菩萨神通先有而未具足，今于坐树下，具六神通，三夜所得，是佛神通；行人法故。

五、欲知一切众生意所趣向，当学般若波罗蜜。

1、知他心通境界少，但知欲界、色界现在众生心心数法，

a、不知过去、未来及无色界众生心心数法。

b、凡夫通，于上四禅地，随所得通处已下，徧知四天下众生心心数法；

- c、声闻通，于上四禅地，随所得通处已下，徧知千世界众生心心数法；
- d、辟支佛通，于上四禅地，随所得通处已下，徧知百千世界众生心心数法；
- e、上地钝根者，不能知下地利根者心心数法；
- f、凡夫不知声闻心心数法；
- g、声闻不知辟支佛心心数法；
- h、辟支佛不知佛心心数法。

以是故说欲知一切众生心所趣向，当学般若波罗蜜。

## 2、以何智能知一切众生心心数法？

- a、诸佛有无碍解脱，入是解脱中，能知一切众生心心数法。
- b、诸大菩萨得相似无碍解脱，亦能知一切众生心心数法。
- c、新学菩萨欲得是大菩萨无碍解脱及佛无碍解脱，以此无碍解脱知一切众生心心数法。
- d、大菩萨欲得佛无碍解脱。

故说欲知一切众生心所趣向，当学般若波罗蜜。

3、心不去、不住而能知心所趣向，

a、诸法无有定相，以是故，但以内六情、外六尘和合生六识，及生六受、六想、六思。

以是故，心如幻化，能知一切众生心心数法；无有知者，无有见者。

b、叹摩诃衍品言：

若一切众生心心数法，性实有不虚诳者，佛不能知一切众生心心数法；  
以一切众生心心数法，性实虚诳无来无去，故佛知一切众生心心数法。

譬如比丘，贪求者不得供养，无所贪求则无所乏短。

心若分别取相则不得实法，不得实法故，不能通达知一切众生心心数法；若不取相、无所分别，则得实法，得实法故，能通达知一切众生心心数法，无所罣碍。

4、一切众生心心数法可得悉知，何以故？

a、如经中说：一切实语中，佛最第一。

佛语皆实，应实有一切智人。

b、众生虽无边，一切种智亦无边，譬如函大盖亦大。

c、众生无边，佛智慧无边，是为实。

若人着无边，取相戏论故，佛说是邪见，

佛多以无常度众生，少用有常。

若着无常，取相戏论，佛说是邪见虚妄。

若不着无常，知无常即是苦，苦即是无我，无我即是空。

能如是依无常观，入诸法空便是实，以是故知无常入真谛中。

d、说无常以明无边，无边故众生厌生死长久。

譬如波梨国四十比丘，俱行十二净行来至佛所，佛为说厌行。

佛问比丘：恒河从所来处流入大海，水为多少？比丘言：甚多！

佛言：但一人一劫中作畜生时，屠割剥刺，或时犯罪截其手足，斩其身首，如是

等血，多于此水。

如是无边大劫中，受身出血不可称数，啼哭流泪及饮母乳亦如是。

计一劫中，一人积骨过于鞞浮罗大山，如是无量劫中受生死苦。

诸比丘闻是已，厌患世间，即时得道。

5、闻十方众生无边故，心生欢喜受不杀戒，得无边福德。

以是因缘故，初发意菩萨，一切世间众生皆应供养，何以故？

为度无边世界众生故，功德亦无边。

有如是等益，故说无边。

是故说悉知一切众生心所趣向，如日照天下，一时俱至，无不遍明。

六、菩萨摩訶萨欲胜一切声闻、辟支佛智慧，当学般若波罗蜜。

1、何等是声闻、辟支佛智慧？

a、以总相、别相观诸法实相，是声闻智慧。

如经中说：初以分别诸法智慧，后用涅槃智慧。

分别诸法智慧是别相，涅槃智慧是总相。

知是法为解、是法为缚，是流转、是来还，是生、是灭，是味、是患，是逆、是顺，

是此岸、是彼岸，是世间、是出世间。

如是等分别二门诸法，名为声闻智慧。

b、三种智慧，知五受蕴如是集、如是散、如是出、是味、是患、是离，三解脱门相应智。如是等分别三门诸法。

c、四种智慧，四念处智，法智、比智、他心智、世智，苦智、集智、灭智、道智，不净智、无常智、苦智、无我智，无常智、苦智、空智、无我智，法智、比智、尽智、无生智。如是等分别四门诸法。

d、从苦法智忍慧，乃至空空三昧、无相无相三昧、无作无作三昧智，于其中间所有智慧，尽是声闻智慧。

e、略说厌世间，念涅槃，离三界，断诸烦恼，得最上法，所谓涅槃，是名声闻智慧。2、菩萨智慧相，与声闻智慧，是一智慧；

但声闻无方便、无大誓庄严、无大慈大悲，不求一切佛法，不求一切种智知一切法，但厌老、病、死，断诸爱系，直趣涅槃为异。

3、声闻智慧即是辟支佛智慧，但时节、利根、福德有差别。

「时」名佛不在世，亦无佛法，以少因缘出家得道，名辟支佛。

「利根」名异法相是同，但智慧深入，得辟支佛道。

「福德」名有相：或一相、二相，乃至三十一相。

若先佛法中得圣法，法灭后成阿罗汉，名为辟支佛，身无有相。

有辟支佛，第一疾者四世行，久者乃至百劫行；

如声闻，疾者三世，久者六十劫。

4、如佛说有四种沙门果，四种圣人：须陀洹乃至阿罗汉。

五种佛子：须陀洹乃至辟支佛。

三种菩提：阿罗汉菩提、辟支佛菩提、佛菩提。

果中、圣中、佛子中、菩提中皆无菩萨，

云何言菩萨胜一切声闻、辟支佛智慧？

a、佛法有二种：一者声闻、辟支佛法，二者摩诃衍法。

声闻法小故，但赞声闻事，不说菩萨事。

摩诃衍广大故，说诸菩萨摩诃萨事，发心、修行、十地、入位、净佛世界、成就众

生、得佛道。

菩萨次佛，应如供养佛，能如是观诸法相，是为福田，能胜声闻、辟支佛。

摩诃衍经中，处处赞菩萨摩诃萨智慧胜声闻、辟支佛。

宝顶经说：

转轮圣王少一、不满千子，虽有大力，诸天世人所不贵重。

有真转轮圣王种，处在胎中，初受七日，便为诸天所贵重，所以者何？

九百九十九人，不能嗣转轮圣王种，令世人得二世乐，

是圣王种虽在胎，必能绍胄圣王，是故恭敬。

诸阿罗汉、辟支佛，虽得根、力、觉、意，六神通，诸禅智慧力，于实际得证，为

众生福田，十方诸佛所不贵重；

b、菩萨虽仍在诸结使、烦恼、欲缚、三毒胎中，初发无上道意，未能有所作，而为诸佛所贵，以其渐渐当行六波罗蜜，得方便力、入菩萨位，乃至得一切种智，无量众生，不断佛种、法种、僧种，不断天上、世间净乐因缘故。

c、又如迦罗频伽鸟，在卵中未出，发声微妙，胜于余鸟；

菩萨摩诃萨虽未出无明亮，说法议论之音，胜于声闻、辟支佛及诸外道。

5、何因缘故，菩萨智慧胜声闻、辟支佛？

a、如本生经中说：

菩萨智慧于无量阿僧祇劫已来合集众智，于无量劫中无苦不行、无难不为。为求法故，赴火、投岩、受剥皮苦，出骨为笔，以血为墨，以皮为纸，书受经法。如是等为法故，受无量苦；以智慧故，世世供养其师，视之如佛。

一切所有经书悉皆诵读、解说；

于无量阿僧祇劫，常思惟筹量，寻求诸法好丑、深浅、善不善、漏不漏、常不常、有无等，思惟分别问难。

为智慧故，供养诸佛及菩萨、声闻，听法、问难、信受、正忆念、如法行。

如是智慧因缘具足故，云何不胜阿罗汉辟支佛！

b、菩萨智慧，五波罗蜜佐助庄严。

c、有般若波罗蜜方便力，于一切众生有慈悲心故，不为邪见所妨。

d、住十地中，故智慧势力深大；大故胜于声闻、辟支佛。

以大因故，小者自坏。阿罗汉、辟支佛无是事。

故言欲胜声闻、辟支佛智慧，当学般若波罗蜜。

七、欲得诸陀罗尼门、诸三昧门，当学般若波罗蜜。

1、陀罗尼门，得陀罗尼方便诸法是，如三三昧名解脱门。

何者是方便门？

若人欲得所闻皆持，应当一心忆念，令念增长；

a、先当作意，于相似事，系心令知所不见事；

如周利槃陀迦，心拭革屣物中，令忆禅定除心垢法。

如是名初学闻持陀罗尼，三闻能得；

心根转利，再闻能得；

成者，一闻能得，得而不忘。是为闻持陀罗尼初方便。

b、或时菩萨入禅定中，得不忘解脱；

不忘解脱力故，一切语言说法，乃至一句一字皆能不忘，是为第二方便。

c、或时神咒力故，得闻持陀罗尼。

d、或时先世行业因缘受生，所闻皆持不忘。

如是等名闻持陀罗尼门。

2、菩萨闻一切音声语言，分别本末观其实相。

知音声语言，念念生灭；音声已灭，而众生忆念取相，

念是已灭之语，作是念：是人骂我而生瞋恚，称赞亦如是。

是菩萨能如是观众生，虽经百千劫骂詈，不生瞋心；若百千劫称赞亦不欢喜；

知音声生灭如响相。又如鼓声无有作者，若无作者是无住处，毕竟空故，但诳愚夫

之耳。是名「入音声陀罗尼」。

3、有陀罗尼，以是四十二字摄一切语言名字。

何者是四十二字？

摩诃般若波罗蜜经中之阿、罗、波、遮、那等四十二字。

阿，不生。行陀罗尼，菩萨闻是阿字，即时入一切法初不生。

如是等，字字随所闻皆入一切诸法实相中，是名「字入门陀罗尼」，

4、菩萨得是一切三世无碍明等诸三昧，于一三昧中，得无量阿僧祇陀罗尼。

如是等和合名为五百陀罗尼门，是为菩萨善法功德藏。如是名为陀罗尼门。

5、诸三昧门者，三昧有二种：声闻法中三昧，摩诃衍法中三昧。

a、声闻法中三昧者，所谓三三昧。

三三昧，空空三昧、无相无相三昧、无作无作三昧。

有三三昧，有觉有观、无觉有观、无觉无观。

有五支三昧、五智三昧等，是名诸三昧。

一切禅定亦名定，亦名三昧。

四禅亦名禅，亦名定，亦名三昧。

除四禅，诸余定亦名定，亦名三昧，不名为禅。

十地中，定名为三昧。

b、摩诃衍三昧者，从首楞严三昧乃至虚空际无所着解脱三昧。

c、三昧即是三昧门。

佛诸三昧无量无数，如虚空无边，故佛说三昧门。

入一门中摄无量三昧，如牵衣一角举衣皆得；亦如得蜜蜂王，余蜂尽摄。

d、展转为门。

如持戒清净，一心精进初夜、后夜勤修思惟，离五欲乐，系心一处，行是方便，得

是三昧，是名三昧门。

欲界系三昧是未到地三昧门；

未到地三昧是初禅门；

初禅及二禅边地三昧是二禅三昧门，

乃至非有想非无想处三昧亦如是；

暖法定是顶法三昧门，顶法是忍法三昧门，忍法是世间第一法三昧门，世间第一法

是苦法忍三昧门；苦法忍乃至金刚三昧门。

一切三昧有三相：入、住、出相；是出相、入相名为门，住相是三昧体。

如是等法，是声闻法中三昧门。

e、摩诃衍法中三昧门，

尸罗波罗蜜是三昧门。何以故？

三支是佛道，所谓戒支、定支、慧支；

清净戒支，是定支门、能生是定，定支能生慧支；

是三支能断烦恼，能与涅槃。以是故尸罗波罗蜜及智慧，名三昧近门。

f、余三波罗蜜虽是门义，名远门。

布施因缘得福德，福德故所愿皆得，如所愿故心柔软，慈悲心故知畏罪、念众生；观世间空无常故，摄心行忍辱，忍辱亦是三昧门；

精进者，于五欲中制心除五盖，摄心不乱，心去则摄、不令驰散，亦是三昧门。

g、初地是二地三昧门，如是展转乃至九地是十地三昧门，十地是无量诸佛三昧门。如是等名为诸三昧门。

6、陀罗尼门、三昧门为同为异？

三昧门、陀罗尼门别异，

三昧但是心相应法，陀罗尼亦是心相应、亦是心不相应。

云何知陀罗尼是心不相应？

a、如人得「闻持陀罗尼」，虽心瞋恚亦不失，常随人行，如影随形。

b、是三昧，修行习久，后能成陀罗尼，如众生久习欲，便成其性。

是诸三昧，共诸法实相智慧，能生陀罗尼。

如坏瓶得火烧熟，能持水不失，亦能令人得度河。

c、禅定无智慧，亦如坏瓶；

若得实相智慧，如坏瓶得火烧成熟，能持菩萨今世、后世无量功德，菩萨亦因之而度得至佛。

如是等，三昧、陀罗尼种种差别。

7、声闻法中无陀罗尼名，以小法中无大，如小家无金银！

a、声闻不大殷勤集诸功德，但以智慧求脱老病死苦；

是故声闻人不用陀罗尼持诸功德。譬如人渴得一掬水则足，不须瓶器持水；

b、若供大众人民，则须瓶瓮持水。菩萨为一切众生故，须陀罗尼持诸功德。

a、声闻法中，多说诸法生灭无常相故。

诸法无常，若无常相则不须陀罗尼，何以故？

诸法无常相则无所持。唯过去行业因缘不失。

b、摩诃衍法，生灭相不实，不生不灭相亦不实，诸观诸相皆灭是为实，

若持过去法则无咎；以持过去善法、善根诸功德故须陀罗尼。

8、陀罗尼世世常随；

菩萨诸三昧则非，或时易身则失。

如是等种种分别陀罗尼、诸三昧，

以是故言欲得诸陀罗尼、诸三昧门，当学般若波罗蜜。

八、一切求声闻、辟支佛人布施时，欲以随喜心过其上者，当学般若波罗蜜。

九、一切求声闻、辟支佛人持戒时，欲以随喜心过其上者，当学般若波罗蜜。

十、一切求声闻、辟支佛人三昧、智慧、解脱、解脱知见，欲以随喜心过其上者，当学般若波罗蜜。

十一、一切求声闻、辟支佛人诸禅定、解脱、三昧，欲以随喜心过其上者，当学般若波罗蜜。

1、随喜名有人作功德，见者心随欢喜，赞言：善哉！

在无常世界中，为痴暗所蔽，能弘大心，建此福德。

譬如种种妙香，一人卖一人买，傍人在边亦得香气，于香无损，二主无失；如是有  
人行施，有人受者，有人在边随喜，功德俱得，二主不失。

如是相，名为随喜。

故菩萨但以随喜心过于求二乘人上，何况自行！

2、菩萨云何能以随喜心过声闻、辟支佛人以财布施上？

a、声闻、辟支佛行是布施，菩萨于傍见之，一心念随喜，赞言善哉！

以此随喜福德，回向阿耨多罗三藐三菩提，为度一切众生故，以此为得无量佛法故。以二种功德，过求声闻、辟支佛人所行布施上。

b、以诸法实相智慧心随喜故，过求声闻、辟支佛人布施上。

c、菩萨以随喜心，生福德果报，回向供养三世十方诸佛，过声闻、辟支佛布施上；譬如人以少物献上国王得报甚多；又如吹贝，用气甚少，其音甚大。

d、菩萨以随喜功德，和合无量诸余功德，乃至法灭亦不尽；

譬如少水置大海中穷劫乃尽。

e、持戒、三昧、智慧、解脱、解脱知见，亦如是。

3、菩萨默然随喜，以智慧力、福德能胜过声闻、辟支佛人勤身疲劳所作功德。

譬如工匠，但以智心指授而去，执斤斧者疲苦终日；计功受赏，匠者三倍。

又如征伐，兵卒冒死斗战，主将受功。

4、菩萨以随喜心、深利智慧相应，胜声闻、辟支佛布施、持戒、三昧、智慧、解脱、解脱知见等六法诸功德。

譬如人于一华中，但取色香，蜂但取味以成蜜；

亦如取水，器大者得多，器小得少。

5、禅定、智慧二法最妙，有此二行，所愿皆得；如鸟有两翼，能有所至。

解脱从此二法得。解脱知见即是智慧。

摩诃衍法中，菩萨得无生法忍，断诸结使，世世常不失六神通，故能以无漏知他心智！

6、初发意菩萨，未得法性生身，若见若闻声闻、辟支佛布施、持戒，皆知当得阿罗汉，随喜心言：此人得诸法实相，离三界，我所欲度一切众生生、老、病、死，彼已得脱，则是我事。

如是等种种因缘故随喜。

十二、菩萨摩訶萨行少施、少戒、少忍、少进、少禅、少智，欲以方便力回向故，而得

无量无边功德者，当学般若波罗蜜。

1、六波罗蜜义在心，不在事多少；菩萨行若多若少，皆是波罗蜜。

八万四千诸波罗蜜：有世间诸波罗蜜，有出世间诸波罗蜜。

2、菩萨何故少施？得无边功德？因缘为何？

a、或有菩萨初发意，福德未集，贫故少施。

b、或有菩萨闻「施无多少，功德在心」，以是故不求多物布施，但求好心。

c、或有菩萨作是念：「若我求多集财物，破戒失善心，心散乱，多恼众生；若恼众生以供养佛，佛所不许，破法求财故。若施凡人，夺彼与此，非平等法；如菩萨法，等心一切，皆如儿子。」以是故少施。

3、菩萨有二种：一者、败坏菩萨，二者、成就菩萨。

a、败坏菩萨者，

本发阿耨多罗三藐三菩提心，不遇善缘，五盖覆心，行杂行，转身受大富贵，

或作国王，或大鬼神王、龙王等。

以本造身、口、意恶业不清净故，不得生诸佛前，及天上、人中无罪处，是名为败坏菩萨。

如是人虽失菩萨心，先世因缘故，犹好布施；多恼众生，劫夺非法，取财以用作福。

b、成就菩萨者，

不失阿耨多罗三藐三菩提心，慈愍众生；

或有在家受五戒者，有出家受戒者。

在家菩萨，虽行业成就，有先世因缘贫穷；

闻佛法有二种施：法施，财施；出家人多应法施，在家者多应财施。

我今以先世因缘故，不生富家，见败菩萨辈作罪布施，心不喜乐，

闻佛不赞多财布施，但美心清净施；以是故，随所有物而施。

又出家菩萨守护戒故，不畜财物；又自思惟：戒之功德，胜于布施。

以是因缘故，随所有而施。

4、菩萨闻佛法中本生因缘，少施得果报多。

a、如薄拘罗阿罗汉，以一河梨勒果药布施，九十一劫不堕恶道，受天人福乐，身常不病，末后身得阿罗汉道。

b、又如沙门二十亿耳，于毘婆尸佛法中作一房舍，给比丘僧；布一羊皮，令僧蹈上。以是因缘故，九十一劫中足不蹈地，受人天中无量福乐。

末后身生大长者家，受身端正，足下生毛长二寸，色如青琉璃右旋；初生，时父与二十亿两金；后厌世五欲，出家得道，佛说精进比丘第一。

c、又如须蔓耳比丘，先世见毘婆尸佛塔，以耳上须蔓华布施。

以是因缘故，九十一劫中常不堕恶道，受天上人中乐；末后身生时，须蔓在耳，香满一室，故字为须蔓耳；后厌世出家，得阿罗汉道。

菩萨如是等本生因缘，少施得大报，便随所有多少而布施。

5、菩萨亦不一定常少物布施，随所有，多则多施，少则少施。

6、佛欲赞般若波罗蜜功德大故，言「少施得大果，功德无量」。

菩萨以般若波罗蜜「方便回向」故，少施福德，无量无边阿僧祇。

何等是「方便回向」，以少布施而得无量无边功德？

a、虽少布施，皆回向阿耨多罗三藐三菩提。

菩萨作是念：我以为是福德因缘，不求人天中王及世间之乐，但求阿耨多罗三藐三菩提。

如阿耨多罗三藐三菩提无量无边，是福德亦无量无边；

b、又以为是福德为度一切众生，如众生无量无边故，是福德亦无量无边。

c、是福德用大慈悲，大慈悲无量无边故，是福德亦无量无边。

d、菩萨福德诸法实相和合故，三分清净：受者、与者、财物不可得故。用是实相智慧布施故，得无量无边福德。

e、菩萨皆念所有福德如相、法性相、实际相故，以如、法性、实际无量无边故，是福德亦无量无边。

7、菩萨久习大悲心故，因众生不知是诸法实相，当令得是实相。

以精进波罗蜜力故，还行福德业因缘，以精进波罗蜜助大悲心；譬如火欲灭，遇得风、薪，火则燃炽。

8、念本愿故，亦十方佛来语言：你当念初发心，

如今始得无生法忍法门，无量法门尚皆未得，当还集诸功德！

9、忍有二种：一者、身忍，二者、心忍。

身忍者，虽身、口不动，而心不能令不起，少忍故不能制心；

心忍者，身、心俱忍，犹如枯木。

少忍者，若人挝骂不还报；大忍者，不分别骂者、忍者、忍法。

众生中忍是为少忍；法忍是为大忍。如是等分别少忍。

10、少进有二：身进，心进。

身进为少，心进为大；

外进为少，内进为大；

身、口进为少，意进为大，

意业大力故，如大仙人瞋时，能令大国磨灭。

身、口作五逆罪，大果报一劫在阿鼻泥犁中。

意业力大，得生非有想非无想，寿八万大劫；亦在十方佛国，寿命无量。故知身、

口精进为少，意精进为大。

身、口、意业寂灭不动，是为大精进；

动者为少精进。如是等名为少精进。

11、少禅者，

欲界定、未到地，不离欲故名少；

亦观二禅，初禅则少；

乃至灭尽定，有漏为少，无漏为大；

未得阿鞞跋致、未得无生法忍禅是为少，

得阿鞞跋致、得无生法忍禅是为大；

乃至坐道场十六解脱相应定为少，十七金刚三昧为大。

若菩萨观一切法常定无散乱者，无依止，无分别，是为大，余者皆为少。

12、慧有二种：一者、世间；二者出世间。

世间慧为少，出世间慧为大。

净慧、杂慧，相慧、无相慧，分别慧、不分别慧，随法慧、破法慧，

为生死慧、为涅槃慧，为自益慧、为益一切众生慧等亦如是。

闻慧为少，思慧为大；思慧为少，修慧为大；有漏慧为少，无漏慧为大。

发阿耨多罗三藐三菩提心慧为少，修行六度慧为大；修慧为少，方便慧为大；

诸地中方展转有大、少，乃至十地。如是等分别多少。

佛叹菩萨奇特，于小事中得无量无边功德，岂况大事！

余人多舍财、持戒、忍辱、精进、禅定、智慧，身口意勤苦，得福少，

不及菩萨少而报大。

譬如口气出声，声则不远；声入角中，声则能远。

如是布施等同少，余人行是所得福报则少；

菩萨摩訶萨以般若波罗蜜方便力回向故，得无量无边福。

故说：欲行少施、少戒、少忍、少进、少禅、少智。

十三、菩萨摩訶萨欲行檀波罗蜜、尸罗波罗蜜、羼提波罗蜜、毘梨耶波罗蜜、禅波罗蜜，

当学般若波罗蜜。

1、五波罗蜜与般若波罗蜜相，亦同、亦异：

异者，般若波罗蜜名观诸法实相故，不受不着一切法；

檀名舍内、外一切所有。以般若波罗蜜心行施，是时檀得名波罗蜜。

五波罗蜜植诸功德，般若波罗蜜除其着心，邪见；

如一人种谷，一人耘除众秽，令得增长，果实成就。

余四波罗蜜亦如是。

2、云何欲行檀波罗蜜，当学般若波罗蜜？

檀有二种：一者、净，二者、不净。

不净者，僇慢故施，嫉妒故施，贪报故施，为名故施，为摄人故施，

如是等种种杂结行施，是名不净。

a、净施者，无是杂事，但以净心因缘果报，敬愍受者，不求今利，但为后世功德。

b、有净施，不求后世利益，但以修心助求涅槃。

c、有净施，生大悲心，为众生故，不求自利早得涅槃；但为阿耨多罗三藐三菩提，

是名净施。

d、以般若波罗蜜心故，能如是净施。

以是故说：欲行檀波罗蜜，当学般若波罗蜜。

3、般若波罗蜜力故，舍诸法着心，何况我心而不舍！

舍吾我心故，身及妻子视如草土，无所恋惜，尽以布施。

故说欲行檀波罗蜜，当学般若波罗蜜。

余波罗蜜亦皆如是，以般若波罗蜜心助成故。

4、诸余波罗蜜，不得般若波罗蜜，不得波罗蜜名字，亦不牢固。

五波罗蜜不得般若波罗蜜，无波罗蜜名字。

又如转轮圣王无轮宝者，不名转轮圣王，不以余宝为名。

亦如群盲无导，不能有所至；

5、般若波罗蜜亦如是，导五波罗蜜，今至萨婆若。

譬如大军无健将，不能成办其事。

又如人身余根虽具，若无眼者，不能有所至。

又如人无命根，则余根皆灭；有命根故，余根有用。

般若波罗蜜亦如是，

五波罗蜜不得般若波罗蜜，则不得增长；  
得般若波罗蜜故，余波罗蜜得增益具足。

故言：欲行檀波罗蜜等，当学般若波罗蜜。

十四、菩萨摩訶萨欲使世世身体与佛相似，

欲具足三十二相，八十随形好，当学般若波罗蜜。

1、菩萨未得佛道，何得身相如佛？

菩萨为度众生故，或作转轮圣王身，或作帝释身，或作梵王身，或作声闻身、  
辟支佛身、菩萨身、佛身。

如《首楞严三昧经》中，文殊师利自说：七十二亿反作一缘觉而般涅槃；  
又现作佛，号龙种尊；时世未应有佛，而众生见佛身，欢喜心伏受化！  
2、菩萨若能作佛身说法度众生者，与佛有何差别？

a、菩萨有大神力，住十住地，具足佛法而住世间，广度众生故，不取涅槃。  
亦如幻师自变化身，为人说法，非真佛身。

虽如是度脱众生，有量有限；佛所度者无量无限。

菩萨虽作佛身，不能遍满十方世界；

佛身者普能遍满无量世界，所可度者，皆现佛身。

亦如十四日月，虽有光明，犹不如十五日。有如是差别。

b、或有菩萨得无生法忍，法性生身，在七住地，住五神通，变身如佛，教化众生。

c、或初发意菩萨行六波罗蜜，行业因缘，得身相似佛，教化众生。

3、三十二相有二种：

一者、具足如佛，般若波罗蜜与布施和合，故能具足相好如佛；

二者、不具足，如转轮圣王，难陀等余人，但行布施等，相不具足。

4、佛法有二种：一者、世谛，二者、第一义谛。

世谛故，说三十二相；第一义谛故，说无相。

5、有二种道：一者、令众生修福道，二者、慧道。

福道故，说三十二相；慧道故，说无相。

为生身故，说三十二相；为法身故，说无相。

6、佛身，以三十二相、八十随形好而自庄严；

法身，以十力、四无所畏、四无碍智、十八不共法诸功德庄严。

7、众生有二种因缘：一者、福德因缘，二者、智慧因缘。

欲引导福德因缘众生故，用三十二相身；

欲以智慧因缘引导众生故，用法身。

8、有二种众生：一者、知诸法假名，二者、着名字。

为着名众生故，说无相；为知诸法假名众生故，说三十二相。

十力、四无所畏功德，一切无漏法，十六行，三三昧相应故，皆名无相；

佛欲令众生解故，种种分别说。

说一切诸佛法，以空、无相、无作印故，皆入如、法性、实际；

而为见色欢喜发道心者，现三十二相庄严身。

为一切众生中显最胜故，现三十二相而不破无相法。

故知三十二相于一切众生中最为殊胜。

9、言无相法者，为破常、净、乐相、我相，男女、生死等相，故如是说。

是故佛法虽无相相，而现三十二相引导众生，令知佛第一，生净信故。  
10、何故说三十二相，不多不少？

佛身丈六，若说少相，则不周遍，不具庄严；若过三十二相，则复杂乱。是故三十二相不多不少，正得其中。

若少不端严，则留八十随形好处；过则杂乱。

11、佛毕竟断众生相、吾我相，具足空法相，何故以相庄严？

若佛但以妙法庄严其心，身无相好者，

或有可度众生，心生轻慢，谓佛身相不具，不能一心乐受佛法。

譬如以不净器盛诸美食，人所不喜；如臭皮囊盛诸宝物，取者不乐。

以是故，佛以三十二相庄严其身。

12、佛常于大众中作师子吼言：我于众生中，一切功德最为第一！

若佛生身不以相好庄严，或有人言：身形丑陋，何所能知！

佛以三十二相、八十随形好庄严其身，众生犹有不信，何况不以相好庄严！

13、佛法甚深，常寂灭相故，

狂愚众生不信不受，谓身灭尽，无所一取。

以是故，佛以广舌、梵音声、身放大光，为种种因缘、譬喻，说上妙法。众生见佛身相威德，又闻音声，皆欢喜信乐。

14、庄严物有内、外，

禅定、智慧诸功德等，是内庄严；身相威德，持戒具足，是外庄严；佛内、外具足。

15、佛愍念一切众生，出兴于世，

以智慧等诸功德，饶益利根众生；身相庄严，饶益钝根众生。

16、心庄严，开涅槃门；身庄严，开天、人乐门。

身庄严故，置众生于三福处；心庄严故，置众生入三解脱门。

身庄严故，拔众生于三恶道；心庄严故，拔众生于三界狱。

如是等无量利益因缘故，以相好庄严生身。

十五、欲生菩萨家，欲得鸠摩罗伽地，欲得不离诸佛，当学般若波罗蜜。

1、菩萨家者，

a、若于众生中发甚深大悲心，是为生菩萨家。

如生王家，无敢轻者，亦不畏饥渴、寒热等。

入菩萨道中，生菩萨家亦如是，

以佛子故，诸天龙、鬼神，诸圣人等无敢轻者，益加恭敬；

不畏恶道、人、天贱处，不畏声闻、辟支佛人、外道论师来沮其心。

b、菩萨初发意，一心作愿：

从今日不复随诸恶心，但欲度脱一切众生，当得阿耨多罗三藐三菩提。

c、菩萨若能知诸法实相，不生不灭，得无生法忍；从是以往，常住菩萨道。

d、若菩萨作是念：如恒河沙等劫为一日一夜，用是日夜，三十日为月，十二月为岁；

如是岁数过百千万亿劫，乃有一佛，于是佛所，供养、持戒、集诸功德；如是恒河

沙等诸佛，然后受记作佛，菩萨心不懈怠，不没不厌，悉皆乐行。

e、菩萨于诸邪定五逆众生，及断善根人中而生慈悲，令人正道，不求恩报。

f、菩萨初发心以来，不为诸烦恼所覆、所坏。

g、菩萨虽观诸法实相，于诸观心亦不生着。

h、菩萨自然口常实言，乃至梦中亦不妄语。

i、菩萨有所见色，皆是佛色，念佛三昧力故，于色亦不着。

j、菩萨见一切众生流转动生死苦中、一切乐中，心亦不着，但作愿言：我及众生，何时

当度？

k、菩萨于一切珍宝心不生着，唯乐三宝。

l、菩萨常断淫欲，乃至不生念想，况有实事！

m、众生眼见菩萨者，即得慈三昧。

n、菩萨能令一切法，悉为佛法，无有听闻、辟支佛法、凡夫之法种种差别。

o、菩萨分别一切法，于一切法中，亦不生法相，亦不生非法相。

如是等无量因缘，是名「生菩萨家」。

2、从发心已来，已生菩萨家，今云何「欲生菩萨家，当学般若波罗蜜」？

有二种菩萨家：

有退转家，不退转家；名字家、实家；净家、杂家；有信坚固家、不坚固家。

为不退转家，乃至信坚固家，

欲得如是等家故言，欲生菩萨家，当学般若波罗蜜。

3、欲得鸠摩罗伽地者，

a、或有菩萨从初发心断淫欲，乃至阿耨多罗三藐三菩提，常行菩萨道，是名鸠摩罗伽地。

b、或有菩萨作愿：世世童男，出家行道，不受世间爱欲，是名为鸠摩罗伽地。

c、又如王子名鸠摩罗伽，

佛为法王，菩萨入法正位，乃至十地故悉名王子，皆任为佛。

如文殊师利，十力、四无所畏等悉具佛事故，住鸠摩罗伽地，广度众生。

d、又如童子过四岁以上，未满二十，名为鸠摩罗伽。

e、若菩萨初生菩萨家者，如婴儿；

得无生法忍，乃至十住地，离诸恶事，名为鸠摩罗伽地。

欲得如是地，当学般若波罗蜜。

4、常欲不离诸佛者，菩萨世所生，常值诸佛。

a、菩萨当化众生，何故常欲值佛？

有菩萨未入菩萨位，未得阿鞞跋致、受记别故；

若远离诸佛，便坏诸善根，没在烦恼，自不能度，安能度人！

如人乘船，中流坏败，欲度他人，反自没水；

又如少汤投大冰池，虽消少处，反更成冰。

菩萨未入法位，若远离诸佛，以少功德、无方便力，欲化众生，虽少利益，反更坠落！以是故，新学菩萨不应远离诸佛。

b、菩萨大心，声闻、辟支佛虽有涅槃利益，无一切智故，不能教导菩萨；

诸佛一切种智故，能教导菩萨。如象没泥，非象不能出；

菩萨亦如是，若入非道中，唯佛能救，同一大道故。

以是故说菩萨常欲不离诸佛。

c、菩萨作是念：我未得佛眼故，如盲无异，若不为佛所引导，则无所趣，错入余道；  
设闻佛法，异处行者，未知教化时节、行法多少。

d、菩萨见佛得种种利益，或眼见心清静，若闻所说，心则乐法，得大智慧，随法修行，而得解脱。

如是等值佛无量利益，岂不一心求欲见佛！

譬如婴儿不应离母，又如行道不离粮食，如大热时不离凉风冷水，如大寒时不欲离火，如度深水不应离船，譬如病人不离良医；

e、菩萨不离诸佛，过于上事。何以故？

父母、亲属、知识、人、天王等，皆不能如佛利益；

佛利益诸菩萨，离诸苦处，住世尊之地。

以是因缘故，菩萨常不离佛。

f、云何得如愿不离诸佛？

福德、智慧具足故，则应得成佛道，何况不离诸佛！

以众生有无量劫罪因缘故，不得如愿；

虽行福德而智慧薄少，虽行智慧而福德薄少，故所愿不成。

菩萨求佛道故，要行二忍：生忍，法忍。

行生忍故，一切众生中发慈悲心，灭无量劫罪，得无量福德；

行法忍故，破诸法无明，得无量智慧。

二行和合故，何愿不得！

以是故，菩萨世世常不离诸佛。

g、菩萨常爱乐念佛故，舍身受身，恒得值佛。

譬如众生习欲心重，受淫鸟身，所谓孔雀、鸳鸯等；

习瞋恚偏多，生毒虫中，所谓恶龙、罗刹、蜈蚣、毒蛇等。

是菩萨心，不贵转轮圣王、人天福乐，但念诸佛，是故随心所重而受身形。

h、菩萨常善修念佛三昧因缘故，所生常值诸佛。

如《般舟三昧》中说：

菩萨入是三昧，即见阿弥陀佛；便问其佛：『何业因缘故，得生彼国？』

佛即答言：『善男子！以常修念佛三昧，忆念不废故，得生我国！』

i、何者是念佛三昧得生彼国？

念佛者，

念佛三十二相、八十随形好、金色身，身出光明遍满十方，如融阎浮檀金，其色明净；又如须弥山王在大海中，日光照时，其色发明。

行者是时都无余色想，所谓山地树木等；

但见虚空中诸佛身相，如真琉璃中赤金外现；

菩萨摩訶萨入念佛三昧，悉见诸佛；以摄心故，心清净故。

譬如有人庄严其身，照净水镜，无不悉见；

此水镜中亦无形相，以明净故，见其身像。

诸法从本以来，常自清净，

菩萨以善修净心，随意悉见诸佛，问其所疑，佛答所问。

闻佛所说，心大欢喜；从三昧起，作是念言：佛从何所来？我身亦不去。

即时便知：诸佛无所从来，我亦无所去。

复作是念：三界所有，皆心所作。何以故？随心所念，悉皆得见；

以心见佛，以心作佛；心即是佛，心即我身；心不自知，亦不自见。

若取心相，悉皆无智，心亦虚诳，皆从无明出。

因是心相，即入诸法实相，所谓常空。

得如是三昧、智慧已，二行力故，随意所愿，不离诸佛；

如金翅鸟王，二翅具足故，于虚空中，自在所至。

菩萨得是三昧、智慧力故，或今身随意供养诸佛，命终亦复值遇诸佛。

故说：菩萨常不离诸佛者，当学般若波罗蜜。

十六、欲以诸善根供养诸佛，恭敬、尊重、赞叹，随意成就者，当学般若波罗蜜。

1、菩萨既得不离诸佛，当应供养。若得值佛而无供具，其心有碍。

如菩萨见燃灯佛，无供养具，周旋求索，见卖华女，以五百金钱，买得五茎青莲华以供养佛。

又萨陀波仑菩萨为供养师故，卖身血肉。

如是等菩萨既得见佛，心欲供养；若无供具，其心有碍。

譬如庶民遇见君长，不持礼祝，则为不敬。

是故诸菩萨求供养具，供养诸佛；佛虽不须，菩萨心得具足。

譬如农夫遇好良田而无种子，虽欲加功，无以使力，心大愁忧！

菩萨亦如是，得遇诸佛而无供具，设有余物，不称其意，心便有碍。

2、诸善根者，

所谓善根果报，华香、瓔珞、衣服、幡盖、种种珍宝等。所以者何？

或时以因说果，如言一月食千两金，金不可食，因金得食，故言食金。

或时以果说因，如见好画，言是好手；手非是画，见画妙故，说言手好。

善根果报亦如是，以善根业因缘故，得供养之具，名为善根。

3、供养具有二种：一者、财供养，二者、法供养。

说善根供养，当知则财、法俱摄。

4、供养者，若见、若闻诸佛功德，心敬尊重，迎逆侍送，旋绕礼拜，曲躬合手而住，

避坐安处，劝进饮食、华香、珍宝等。

种种称赞持戒、禅定、智慧诸功德。

有所说法，信受教诲。

如是善身、口、意业，是为供养。

- 5、尊重者，知一切众生中，德无过上，故言尊；敬畏之心过于父母、师长、君王，利益重故，故言重。
- 6、恭敬者，谦逊畏难故言恭；推其智德故言敬。
- 7、赞叹者，美其功德为赞；赞之不足，又称扬之，故言叹。
- 8、随意成就者，  
若须华供养，如意即至，或求得，或不求而得；有自然出者，或变化生；乃至伎乐供养之具，悉皆如是。
- 9、菩萨遇得，便以供养，何以随意求索？  
福德从心，于所爱重，持用供养，得福增多。  
如阿育王小儿时，以所重土，持用奉佛；得阎浮提王，一日之中起八万塔。  
若大人虽以多土投钵而无所得，非所重故。
- 有人偏贵重华，以其所贵，持供养佛，得福增多；乃至宝物亦如是。
- 10、随时所宜，  
若寒时，应以薪火、上衣、温室、被褥，及以饮食；

热时，应以冰水、扇盖、凉室、生薄之服，上妙之食；风雨之时，就送供具；如是等随时供养。

11、又随土地所宜，随受者所需，皆持供养。

12、随意供养者，

a、有菩萨知佛无所须，又知诸物虚诞如幻，一相，所谓无相；为教化众生故，随众生国土所重，引导故供养。

b、有菩萨得甚深禅定，生菩萨神通，

以神通力故，飞到十方佛前，或于佛国，若须遍雨天华，即满三千世界持供养佛；或雨天梅檀，或雨真珠，光明鲜发；或雨七宝；或雨如意珠，大如须弥；或雨妓乐，音声清妙；或以身如须弥以为灯炷，供养诸佛。

如是等名为财供养。

13、又菩萨行六波罗蜜，以法供养诸佛：

a、或有菩萨行一地法、供养诸佛，乃至十地、行法供养。

b、或时菩萨得无生法忍，自除烦恼及众生烦恼，是法供养。

c、或时菩萨住于十地，以神力故，令地狱火灭；于饿鬼道，皆得饱满；令畜生得离恐怖，令生人、天；渐住阿惟越致地。

如是等大功德力故，名为法供养。

故说：欲得善根成就，当学般若波罗蜜。

十七、欲满一切众生所愿：

衣服、饮食、卧具，涂香、车乘、房舍、床榻、灯烛等，当学般若波罗蜜。

1、有何次第，欲满一切众生愿？

菩萨业有二种：一为供养诸佛，二为度脱众生。

a、以供养诸佛，得无量福德。

b、持是福德，利益众生，所谓满众生愿。

如贾客主人海采宝，安隐得出，利益所亲及知识等；

c、菩萨如是人诸佛法海，得无量功德之宝，利益众生。

如小王供养大王，能令欢喜，与其所愿，职位财帛，还其本国，利益人物，除却怨

贼。

d、菩萨供养诸佛法王故，得受记别；

e、以无量善根珍宝，得无尽智力，来入众生。

f、善人供养，贫者随其所须而给与之，

g、魔民、邪见外道之属悉皆破坏。

是为供养诸佛，次满众生所愿。

2、菩萨实能满一切众生愿不？

若悉满众生愿，余佛菩萨何所利益？

若不悉满，何故说欲满一切众生愿，当学般若波罗蜜？

有二种愿：一者、可得愿；二者、不可得愿。

a、不可得愿者，

有人欲筹量虚空，尽其边际，及求时、方、边际，如小儿求水中月、镜中像；如是等愿皆不可得。

b、可得愿者，

钻木求火，穿地得水，修福得人天中生，及得阿罗汉、辟支佛果，乃至得诸佛法王；如是等名皆可得愿。

可得愿有二种：一谓世间，二谓出世间。

是中世间愿故，满众生愿。云何得知？

以饮食、床、卧具乃至灯烛，所须之物，皆给与之。

c、菩萨何以故与众生易得愿，不与难者？

愿有下、中、上。

下愿令致今世乐因缘，中愿与后世乐因缘，上愿与涅槃因缘；

是故先与下愿，次及中愿，然后上愿。

众生多着今乐，少求后乐，涅槃乐者转复少。若说多者，少亦摄之。

3、菩萨法者，常与众生种种利益，不应有舍。所以者何？

a、初心但欲令诸众生行大乘法；

b、以不堪受化，次与声闻、辟支佛道；

c、若复不能，当与十善，四梵行等，令修福德。

d、若众生都不乐者，如是众生不应遗舍，当与今世利益，所谓饮食等。

4、凡夫有因缘，才能与人饮食等、满彼愿；

声闻、辟支佛虽无因缘满众生愿，而所益甚少；

菩萨摩訶萨行檀波罗蜜业因缘故，得为国王，或为大长者，财富无量，

四方众生若来求者，尽满足之，然后说法，令离四食，皆住阿鞞跋致地。

如是等菩萨神通力故，能满众生愿。

5、云何菩萨能满其愿？

菩萨住于十地，入首楞严三昧，于三千大千世界，

或时现初发意，行六波罗蜜；

或现阿鞞跋致；

或现一生补处，于兜率天上，为诸天说法；

或从兜率天上来下生净饭王宫；

或现出家成佛；

或现大众中转法轮，度无量众生；

或现入涅槃，起七宝塔，遍诸国土，令众生供养舍利；

或时法都灭尽。

菩萨利益如是，何况于佛！

6、佛身有二种：一者、真身，二者、化身。

a、众生见佛真身，无愿不满。

佛真身者，遍于虚空，光明遍照十方，说法音声亦遍十方；无量恒河沙等世界满中

大众，皆共听法；说法不息，一时之顷，各随所闻而得解悟。

如劫尽已，众生行业因缘故，大雨澍下，间无断绝，三大所不能制；

惟有劫尽十方风起，更互相对，能持此水。

如是法性身佛有所说法，除十住菩萨，三乘之人皆不能持；

惟有十住菩萨不可思议方便智力，悉能听受。

众生其有见法身佛，无有三毒及众烦恼，寒热诸苦一切皆灭，无愿不满。

如如意珠，尚令众生随愿皆得，岂况于佛！

珠与一切世间之愿，佛与一切出世间愿！

b、释迦牟尼佛，王宫受身，现受人法，有寒热，饥渴、睡眠，受诸诽谤，老、病、死等；

内心智慧神德，真佛正觉无异，欲满众生所愿，悉皆能满；而不满者，以无数世来，常满众生衣、食之愿，而不免苦；今但以涅槃无为常乐益之。

如人怜愍所亲，不与杂毒美食。

如是世间愿者，生诸结使，又复离时，心生大苦，是故不以为要。

c、释迦牟尼佛已满众生所愿，而众生自不能得。

维摩诘经：佛以足指按地，即时国土七宝庄严，我佛国如是。

又如龙王等心降雨，在人为水；饿鬼身上皆为炭火。

故非佛不慈，而是众生无福。

d、若能满一切众生愿者，则众生有边，无有受诸饥寒苦者。何以故？一切众生皆满所愿，愿离苦得乐故。

7、满一切愿者，名字一切，非实一切。

法句偈：一切皆惧死，莫不畏杖痛，恕己可为譬，勿杀勿行杖！

虽言一切畏杖痛，如无色众生无身故，则无杖痛；色界众生虽可有身，亦无杖痛；

欲界众生亦有不杖痛。

而言一切，谓应得杖者，说言一切，非实一切。

以是故，菩萨满一切众生所愿，谓应可得者。

然菩萨心无齐限，福德果报亦无有量；

a、但众生无量阿僧祇劫罪厚障故，而不能得。

b、有薄福众生，罪甚此者，佛不能救。

c、又知众生不可得故，深达法性故，

诸佛无有忆想分别：是可度、是不可度；心常寂灭，意无增减。

以是故，菩萨欲满一切众生愿，众生以罪故而不能得！

8、饮、食者，人中饮食及天饮食，来皆饱满。

衣服者，衣有二种：或从众生生，或从草木生。

有诸天衣，无有经纬，自然树出，光色轻软。

卧具者，床榻、被褥、帟帐、枕等。

涂香者，有二种：一者、栴檀木等，摩以涂身；

二者、种种杂香，捣以为末，涂身，熏衣服，涂地壁。

乘者，所谓象、马、车舆等。

房舍者，所谓土木宝物所成楼阁、殿堂、宫观等，以障寒热、风雨贼盗之属。

灯烛者，所谓脂膏、苏油、漆蜡、明珠等。

诸物者，是一切众生所须之物。

9、以般若波罗蜜和合故，得名檀波罗蜜。

所可满众生愿者，非谓一国土、一阎浮提，都欲满十方世界六趣众生所愿，

a、非但布施所能办故。

b、以般若波罗蜜破近远相，破一切众生相，非一切众生相，除诸碍故；

弹指之顷，化无量身，遍至十方，能满一切众生所愿。

如是神通利益，要从般若出生。

故菩萨欲满一切众生愿，当学般若波罗蜜。

十八、菩萨摩訶萨欲使如恒河沙等世界众生，立于檀波罗蜜，立于尸罗、羼提、毘梨耶、

禅那、般若波罗蜜，当学般若波罗蜜。

1、利有三种：今世利、后世利、毕竟利。

有三种乐：今世、后世、出世乐。

2、已说今世利乐，此说后世、出世利乐。以是故，令众生住六波罗蜜。

菩萨愍念众生，过于父母念子，慈悲之心，彻于骨髓。

a、先以饮食充足其身，除饥渴苦；次以衣服庄严其身，令得受乐。

b、菩萨心不满足，复作是念：众生已得今世乐，更思惟令得后世乐。

若以世间六波罗蜜教之，则得人、天中乐，久后还来轮转生死；

c、当复以出世间六波罗蜜，令得无为常乐。

a、先以衣服、华香等庄严其身，

b、今以功德庄严其心。

若有三种庄严，则为具足、无有过者：

一者、衣服七宝等；二者、福德；三者、道法。

菩萨欲具足三种庄严众生故，先说功德果报，今说功德因缘。

1、前说虽有大施，而众生罪故，不能悉得。

如《饿鬼经》说：虽与其食而不得噉，变成炭火不净之物！

2、又菩萨不舍一切，当作方便，令众生得衣食利益，是故教修福业，自行自得。

菩萨善知因缘不可强得，教令得之。

以是故，次第教众生住六波罗蜜。

3、菩萨志愿令十方一切众生住六波罗蜜，今说如恒河沙世界众生，

为听法者闻恒河沙故；又于新发意菩萨以无边无量为多，多则致乱；

若大菩萨，不以恒河沙为数。

如恒河沙者，是无边无量数。

如恒河沙者，已说十方诸世界，

众生者，于五众、十八界、十二入、六种、十二因缘等众多法中，

假名众生是天、是人、是牛、是马。

众生有二种：动者、静者。动者生身、口业，静者不能。

有色众生，无色众生；无足、二足、四足、多足众生；世间、出世间众生；大者、小者；贤圣、凡夫；邪定、正定、不定众生；苦、乐、不苦不乐众生；上、中、下众生；学、无学、非学非无学众生；有想、无想、非有想非无想众生；欲界、色界、无色界众生。

欲界众生者，有三种：以善根有上、中、下故。

上者、六欲天，中者、人中富贵，下者、人中卑贱。

以面类不同故，四天下别异。

不善亦有三品：上者地狱，中者畜生，下者饿鬼。

欲界众生有十种：三恶道、人、及六天。

地狱有三种：热地狱、寒地狱、黑暗地狱。

畜生有三种：空行、陆行、水行；昼行、夜行、昼夜行；如是等差别。

鬼有二种：弊鬼、饿鬼。

弊鬼如天受乐，但与饿鬼同住，即为其主；

饿鬼腹如山谷，咽如针，身惟有三事：黑皮、筋、骨，无数百岁不闻饮食之名，何

况得见！

有鬼，火从口出，飞蛾投火，以为饮食。

有食粪，涕唾脓血，洗器遗余。或得祭祀，或食产生不净。如是等种种饿鬼。

六欲天者，四王天等；

于六天中间，别复有天，所谓持瓔珞天，戏忘天，心恚天，鸟足天，乐见天。

此诸天等，皆六天所摄。

阿修罗力与三十三天等。何以故？或为诸天所破，或时能破诸天。

如经中说：释提桓因为阿修罗所破，四种兵众入藕根孔以自藏翳。

受五欲乐，与天相似，为佛弟子。

如阿修罗、甄陀罗、乾闥婆、鸠槃荼、夜叉、罗刹、浮陀等大神是天；

阿修罗民众，受乐小减诸天，威德变化，随意所作，

分别善恶故有六道：善有上、中、下故，有三善道：天、人、阿修罗；

恶有上、中、下故，地狱、畜生、饿鬼道。

世间善有三品：上分因缘故，天道果报；中分因缘故，人道果报；下分因缘故，阿

修罗道果报。

人中可得出家受戒，以至于道。

阿修罗道结使覆心，得道甚难。

诸天虽随结使，心直信道；阿修罗众，心多邪曲，不时近道。

以是故，阿修罗虽与天相似，

如龙王、金翅鸟，力势虽大，亦能变化故，以其近道难故，在畜生道中；

是龙王、金翅鸟，虽复受乐，傍行形同畜生故，畜生道摄。

地狱、饿鬼形虽似人，以其大苦故，不入人道。

阿修罗力势既大，形似人、天故，别立六道。

4、立檀波罗蜜者，

a、菩萨语诸众生：

当行布施！贫为大苦，无以贫故，作诸恶行，堕三恶道；作诸恶行，堕三恶道，则不可救。

b、众生闻已，舍慳贪心，行檀波罗蜜。

菩萨于众生前，种种因缘、种种譬喻而为说法，毁訾慳贪。

c、慳贪者，

自身所须，惜不能用；见告求者，心浊色变，即于现身声色丑恶；种后世恶业故，受形丑陋。先不种布施因缘故，今身贫贱；慳着财物，多求不息，开诸罪门；专造恶事故，堕恶道中！

d、生死轮转利益之业，无过布施，今世、后世随意便身之事，悉从施得；

施为善导，能开三乐：天上、人中、涅槃之乐。

好施之人，声誉流布，八方信乐，无不敬爱；处大众中无所畏难，死时无悔。

e、其人自念：我以财物植良福田，人、天中乐，涅槃之门，我必得之！

所以者何？

施破慳结，慈念受者；灭除瞋恼，嫉妒心息；恭敬受者，则除憍慢；决心施，疑网自裂；知施果报，则除邪见及灭无明。

如是等诸烦恼破，则涅槃门开。

f、非但开三乐而已，乃能开无量佛道、世尊之处。所以者何？

六波罗蜜是佛道，檀为初门，余行皆悉随从。

如是等布施，有无量功德；以是因缘故，令众生立檀波罗蜜。

## 5、立尸罗者，

菩萨于众生前，赞说戒行：汝诸众生，当学持戒！

持戒之德，拔三恶趣及人中下贱，令得天、人尊贵，乃至佛道。

戒为一切众生众乐根本，譬如大藏，出诸珍宝；

戒为大护，能灭众怖，譬如大军破贼；

戒为庄严，如着瓔珞；戒为大船，能度生死巨海；

戒为大乘，能致重宝，至涅槃城；戒为良药，能破结病。

戒为善知识，世世随逐不相远离，令心安隐；

譬如穿井，已见湿泥，喜庆自欢，无复忧患。

戒能成就利益诸行，譬如父母长育众子；戒为智梯，能入无漏；

戒能惊怖诸结，譬如师子，能令群兽摄伏；

戒为一切诸德之根，出家之要。

修净戒者，所愿随意；譬如如意珠，应念时得。

如是等种种赞戒之德，令众生欢喜，发心住尸罗波罗蜜。

## 6、住羸提者，

于众生前，赞叹忍辱：

忍为一切出家之力，能伏诸恶，能于众中现奇特事；

忍能守护，令施、戒不毁；忍为大铠，众兵不加；忍为良药，能除恶毒；

忍为善胜，于生死险道，安隐无患；忍为大藏，施贫苦人无极大宝；

忍为大舟，能渡生死此岸，到涅槃彼岸。

求佛道、度众生之利器，忍为最妙！

行者当作是念：

我若以瞋报彼，则为自害！又我先世自有是罪，不得如意，要必当偿；

若于此人不受，余亦害我，俱不得免，云何起瞋？

众生为烦恼所牵，起诸恶事，不得自在。

譬如人为非人所持，而骂辱良医，良医是时但为除鬼，不嫌其骂；

行者亦如是，众生加恶向己，不嫌其瞋，但为除结。

行忍之人，视前骂辱者，如父母视婴孩，见其瞋骂，益加慈念，爱之踰深。

又复自念：彼人加恶于我，是业因缘，前世自造，今当受之；若以瞋报，更造后苦，何时得解！若今忍之，永得离苦，是故不应起瞋。

如是种种因缘，诃瞋恚、生慈悲，入众生忍中。

入众生忍中已，作是念：

十方诸佛所说法，皆无有我，亦无我所，但诸法和合，假名众生。

如机关木人，虽能动作，内无有主；

身亦如是，但皮骨相持，随心风转；念念生灭，无常空寂；无有作者，无骂者，亦无受者，本末毕竟空故；但颠倒虚诳故，凡夫心着。

如是思惟已，则无众生；无众生已，法无所属，但因缘和合无有自性。

如众生和合，强名众生，法亦如是，即得法忍。

得是众生忍、法忍故，能得阿耨多罗三藐三菩提，何况诸余利益！

众生闻是已，住麁提波罗蜜。

7、立毘梨耶者，

教众生言：莫懈怠！若能精进，诸善功德悉皆易得；若懈怠者，见木有火而不能得，

何况余事！是故劝令精进；若人随方便精进，无愿不得。

凡得胜法，非无因缘，皆从精进生。

精进有二相：一、能生诸善法，二、能除诸恶法。

有三相：一、欲造事，二、精进作，三、不休息。

有四相：已生恶法断之令灭，未生恶法能令不生，

未生善法能令发生，已生善法能令增长。

如是等名精进相。

精进故能助成一切善法；譬如火得风助，其燃乃炽；

又如世间勇健之人，能越山渡海；

道法精进，乃至能得佛道，何况余事！

众生闻已，皆立精进波罗蜜。

菩萨见有未发阿耨多罗三藐三菩提者，为赞叹阿耨多罗三藐三菩提法，

于一切诸法中最为第一，极为尊贵，能饶益一切，令得诸法实相不诳之法。有大慈悲，具一切智，金色身相，第一微妙；

三十二相，八十随形好，无量光明；

无量戒、定、智慧、解脱、解脱知见；三达明无碍，于一切法无碍解脱。

得如是者，一切众生中最为上尊，应受一切世间供养。

若人但心念佛，尚得无量无尽福德，

何况精进布施、持戒、供养、承事、礼拜者！

语众生言：佛事如是，你等当发无上道心，勤修精进；行如法者，得之不难！众生闻是已，便发无上道心。

若发心者，不可但空思口说而得，当行檀波罗蜜；行檀波罗蜜次，行尸波罗蜜，麤提波罗蜜，禅波罗蜜，般若波罗蜜；行五波罗蜜，则是毘梨耶波罗蜜。

若不发大乘心者，当教辟支佛道；

若无辟支佛道者，教行声闻道；

若无声闻道者，教令离色，受无色定，寂灭安乐；

若无无色定者，教令离欲，受色界种种禅定乐；

若无禅者，教令修十善道，人、天中受种种乐。

莫自懈怠，空无所得，贫穷下贱，种种勤苦，甚为可患！

懈怠法者，最为弊恶，破坏今世、后世利益善道。

众生闻已，集诸善法，勤行精进。

## 8、立禅者，

菩萨于众生前，赞叹禅定清净乐，内乐，自在乐，离罪乐，今世、后世乐，圣所受

乐，梵天王乐，遍身受乐，深厚妙乐；

诸众生等，何以着五欲不净乐，与畜生同受诸罪垢乐，而舍是妙乐？

若能舍小乐，则得大乐。

岂不见田夫弃少种子，后获大果；如人献王少物而得大报；

如少钩饵而得大鱼，所舍甚少而所获大多。

智者亦如是，能弃世间之乐，得甚深禅定快乐。

既得此乐，反观欲乐，甚为不净，如从狱出；如病得愈，更不求药。

禅定名实智初门，令智慧澄静，能照诸法；如灯在密室，其明得用。

若依禅定得四无量、背舍、胜处、神通、辩才等；

诸甚深功德，悉皆具得，能令瓦石变成如意宝珠，何况余事！

随意所为，无不能作：入地如水，履水如地，手捉日、月，身不焦、冷；

化为种种禽、兽之身，而不受其法。

或时变身充满虚空，或时身若微尘，或轻如鸿毛，或重若泰山；

或时以足指按地，天地大动，如动草叶。如是等神通变化力，皆从禅得。

众生闻是已，立于禅波罗蜜。

## 9、立般若波罗蜜者，

菩萨教诸众生：当学智慧！智慧者，其明第一，名为慧眼。

若无慧眼，虽有肉眼，犹故是盲；虽云有眼，与畜生无异。

若有智慧，自别好丑，不随他教；

若无智慧，随人东西，如牛骆驼穿鼻随人。

一切有为法中，智慧为上！圣所亲爱，能破有为法故。

如《经》中说：

于诸宝中，智慧宝为最；一切利器中，慧刀利为最；住智慧山顶，无有忧患！

观诸苦恼众生，无不悉见。智慧刀能断无始烦恼生死连锁；

智慧力故，能具六波罗蜜，得不可思议无量佛道、成一切智，

何况声闻、辟支佛，及世间胜事！

是智慧增长清净，不可沮坏，名为波罗蜜。

众生闻已，住般若波罗蜜。

10、菩萨或不以口教，或现神足光明，令众生住六波罗蜜；

或现种种余缘，乃至梦中为作因缘，使其觉悟，令众生住六波罗蜜。

故言：欲令众生住六波罗蜜，当学般若波罗蜜！

十九、欲植一善根于佛福田中，至得阿耨多罗三藐三菩提不尽者，当学般若波罗蜜。

1、善根者，三善根：无贪善根，无瞋善根，无痴善根。

一切诸善法，皆从三善根生长；如药树、草木，因有根故，得生长。

以是故，名为诸善根。

此处所言善根者，善根因缘供养之具，所谓花香、灯明，及法供养，持戒、诵经等，因中说果。何以故？香华不定，以善心供养故，名为善根。

布施非即是福，但能破慳贪，开善法门；

善根名为福，如针导縊缝衣，缝非针。

2、一者：若华、若香、若灯明，若礼敬，若诵经、持戒，若禅定，若智慧等，一一供养及法供养，植于诸佛田中。

3、佛田者，十方三世诸佛；若佛在世，若形像，若舍利，若但念佛。

4、植者，专心坚着。

虽有种种福田，佛为第一福田，以十力、四无所畏、十八不共法如是等无量佛法具足，是故独说植于佛田。

法宝虽为佛师，若佛不说，法为无用；如虽有好药，若无良医，药则无用。以是故，法宝虽上而前说佛宝，何况僧宝！

佛田能获无量果报，余者虽言无量而有差降；以是故，佛田第一。

5、不尽者，

a、诸佛成就无量功德故，于中植福，福亦无尽。

b、佛功德无量、无边、无数、无等故，植福者，福亦不尽。

c、佛为菩萨时，缘一切众生，如众生无量、无边故，福亦无尽。

d、佛田清净：拔爱等诸烦恼秽草，净戒为平地，大慈悲为良美，除诸恶邪咸土；三十  
七品为善道，十力、四无所畏、四无碍智等为垣墙，能出生三乘涅槃果报，植种于  
此无上无比田者，其福无尽！

e、一切有为法，虽念念生灭，相续不断，果报不失故，名为不尽。

如灯虽焰焰生灭，不名灭，脂尽炷灭，乃可称灭。

福亦如是，深心种于良田故，乃至法尽而亦不尽。

f、菩萨知诸法实相，如涅槃不尽，福德人诸法实相故，而亦不尽。

g、是福德者以智慧力故，令是功德如涅槃毕竟空，不生不灭。

以是故，喻如涅槃，非即涅槃；若是涅槃，不应为喻。

若是涅槃，云何果报成佛而不尽？

譬如三解脱门：空、无相、无作。

如解脱毕竟空相，是空解脱门，观世间亦毕竟空；

如解脱无相相，是无相解脱门，观世间亦无相相；

如解脱无作相，是无作解脱门，观世间亦无作相。

故说：欲植一善根于佛福田，乃至阿耨多罗三藐三菩提而不尽者，当学般若波罗蜜。

二十、菩萨摩訶萨欲令十方诸佛称赞其名，当学般若波罗蜜。

1、佛法有二门：一、为第一义门，二、为世俗法门。

a、以世俗门故，欲令诸佛赞叹；

虽为诸佛所赞叹，而不见我，不取众生相，世间假名故说。

b、今是菩萨欲得决定知是阿鞞跋致否，以是故，求佛赞叹，非求供养！

c、余众生为贪欲、瞋恚、愚痴覆心故，不能如实赞叹。何以故？

若偏有所爱，不见实过，但见功德；

若偏有所瞋，但见其过，不见其德；

若愚痴多，不能如实见其好丑。

诸天、世人虽有智慧，三毒薄者，亦不能得如实赞，犹有谬失；

无一切智故，结使不尽故。

声闻、辟支佛三毒虽尽，亦不能如实赞，犹有余气未尽；又智慧不具足故。

唯佛一人，三毒及气永尽，成就一切智故，能如实赞，不增不减。

以是故，行者欲得诸佛所赞，知其实德，不求余人称赞。

2、若诸佛出于三界，不着世间，无有我及我所；

视于外道、恶人、大菩萨、阿罗汉，一无无异，云何赞叹菩萨？

a、佛虽无吾我，无有憎爱，于一切法，心无所着；

怜悯众生，以大慈悲心引导一切故，分别善人而有所赞；亦欲破坏恶魔所愿；以佛赞叹故，无量众生爱乐菩萨，恭敬供养，后皆成就佛道。

以是故，诸佛赞叹菩萨。

b、云何赞叹？

如佛于大众中说法，欲令众生入甚深法，赞是菩萨，如萨陀波仑等。

佛赞叹菩萨言：

是菩萨能观诸法毕竟空，亦能于众生有大慈悲。

能行生忍，亦不见众生；虽行法忍，于一切法而不生着；

虽观宿命事，不堕始见；虽观众生入无余涅槃，而不堕边见；

虽知涅槃是无上实法，亦能起身、口、意善业；

虽行生、死中，而深心爱乐涅槃；

虽住三解脱门观于涅槃，亦不断本愿及善行。

如是等种种奇特功德，甚为难有！

3、若菩萨未得无生忍，未得五神通，生死肉身，有大慈悲心，能为众生故，内、外所有所贵惜者，悉能施与；

外谓所着妻子、上妙五欲，如意珠、最上宝，安乐国土等；

内谓身体、肌肉、皮肤、骨、血、头、目、髓、脑、耳、鼻、手、足。

如是等施，甚为难有！是故诸佛赞叹其德。

4、若菩萨入法位，得神通，行苦行不足为难；

以是菩萨生身肉眼，志愿弘旷，有大悲心，爱乐佛道，行如是事，甚为希有！  
若菩萨持戒清净具足，无所分别持戒、破戒；

于一切诸法毕竟不生，常空法忍。

精进不休不息，不着不厌；精进、懈怠，一相不异；

无量无边无数劫，勤修精进。

都欲受行甚深禅定，无所依止，定乱不异；

不起于定而能变身无量，遍至十方说法度人。

行深般若波罗蜜智慧，观一切法

不生不灭，非不生非不灭，亦非不生亦非不灭，非非不生非非不灭；

过诸语言，心行处灭；不可坏不可破，不可受不可着；

诸圣行处，净如涅槃，亦不着是观，意亦不没，能以智慧而自饶益。

如是菩萨，诸佛赞叹。

5、菩萨未得受记，未得无生法忍，生不值佛，不见贤圣；

以正思惟故，能观诸法实相，虽观实相，心亦不着。

如是菩萨，十方诸佛皆共赞叹。

6、菩萨闻甚深无量无边不可思议佛法，虽自未得，智慧未及，而能定心信乐，不生疑悔；若魔作佛来诡说其意，意无增减。

如是菩萨，诸佛所赞。

7、有诸菩萨一时发心，中有疾成佛者，佛则赞叹，有大精进力故。

如释迦牟尼佛与弥勒等诸菩萨同时发心，释迦牟尼佛精进力故，超越九劫。

8、若有菩萨具足菩萨事，所谓十地、六波罗蜜、十力、四无所畏、四无碍智、十八不共法等无量清净佛法；为众生故，久住生死，不取阿耨多罗三藐三菩提，而广度众生。

如是菩萨，诸佛赞叹。何者是？

如文殊师利、毘摩罗诘、观世音、大势至、遍吉等，诸菩萨之上首，

出于三界，变化无央数身，入于生死，教化众生故。

如是希有事，皆从甚深般若波罗蜜生。

以是故说：欲得诸佛称叹其名，当学般若波罗蜜。

二十一、菩萨摩訶萨欲一发意至十方如恒河沙等世界，当学般若波罗蜜。

1、菩萨得身通变化力，作十方恒河沙等身，于十方恒河沙等世界，一时能到。

2、经说：五事不可思议，众生多少，业果报，坐禅人力，诸龙力，诸佛力。

于五不可思议中，佛力最不可思议！

菩萨入深禅定，生不可思议神通故，一念中悉到十方诸佛世界。

诸菩萨以无生忍力故，破诸烦恼无明壳，即时一念中，作无量身，遍至十方。

3、菩萨一切无量世罪，悉已消灭；以智慧力故，能转一切诸法，所谓小能作大，大能

作小，能以千万无量劫为一日，又能以一日为千万劫。

是菩萨世间之主，所欲自在，何愿不满！

以是因缘故，菩萨乘神通力，能速疾超越十方世界。

以是故言：欲一发意到十方恒河沙世界者，当学般若波罗蜜。

二十二、菩萨摩訶萨欲发一音使十方如恒河沙等世界闻声，当学般若波罗蜜。

1、菩萨得六神通，增长梵声相，过三千大千世界，至十方恒河沙等诸世界。

菩萨音声有恒河沙等之数，佛音声所到无有限数。

目连试佛音声，极至西方，犹闻佛音，若如对面。

2、佛音声有二种：一为密中音声；二为不密音声，至佛边乃闻。

亦有二种弟子：一为出世圣人，如目犍连等，能闻微密音声，

二为世间凡夫，随其所近乃闻。

3、诸菩萨得人正位，离生死身，得法性真形，

能见十方无量佛身，及遍照光明，亦能得闻诸佛六十种极远无量音声。

诸大菩萨虽未具足如佛音声，于佛音声中普得其分。

4、是佛菩萨音声有三种：

一者、先世种善音声因缘故，咽喉中得微妙四大，能出种种妙好远近音声，所谓一

里、二里、百里、千里，乃至三千大千世界，音声遍满。

二者、神通力故，咽喉四大出声，遍满三千大千世界，及十方恒河沙世界。

三者、佛音声常能遍满十方虚空。

众生无量劫以来，所作恶业覆，是故不闻。

譬如雷电霹雳，聋者不闻，雷声无减；

佛亦如是，常为众生说法，如龙震大雷声，众生罪故，自不得闻。如今世人精进持戒者，于念佛三昧，

心得定时，罪垢不障，即得见佛，闻佛说法，音声清了。

菩萨于三种音声中，欲得二种，

是二种音声，甚难希有故；如业果音声，自然可得故。

故说：菩萨摩訶萨欲以一音使十方恒河沙等世界闻声者，当学般若波罗蜜。

二十三、菩萨摩訶萨欲使诸佛世界不断者，当学般若波罗蜜。

1、佛世界不断者，菩萨欲令国国相次，皆使众生发心作佛。

2、菩萨心愿，欲令一切世界皆悉作佛，大心旷远，无有齐限；

以是心集诸智慧，无量福德神通力故。

又随众生种作佛因缘者，是菩萨皆悉令作。

3、十方世界无量无边，不应一菩萨尽得遍诸世界、令佛种不断；

诸余菩萨各随因缘，皆有其分。

以慈悲大故，愿亦无量，利益之心无有齐限。

众生种无量故，非一佛一菩萨所可尽度。

4、欲令心愿旷大清净故；

如行慈三昧，虽不能令众生离苦，但自欲令心旷大清净，成利益愿故。

如诸佛大菩萨力，皆能度一切众生，

而众生福缘未集，未有智慧；因缘不会故，而不得度。

如大海水，一切众生取用，水不穷竭，但众生不能得用；

如饿鬼众生自罪因缘，不得见水，设得见之，即时干竭，或为洋铜或成脓血。

佛亦如是，有大慈悲智慧无量无边，悉能满足众生，

而众生罪业因缘故而不值佛；

设得值佛，如余人无异，或生瞋恚，或起诽谤；

以是因缘故，不见佛威相神力，虽得值佛而无利益。

5、二因二缘，发于正见，所谓内因、外缘。

a、佛外因缘具足，有三十二相、八十随形好，无量光明庄严其身，种种神力，种种音声，随意说法，断一切疑；

b、但众生内因缘不具足，先不种见佛善根而不信敬，不精进持戒，钝根深厚，着于世乐，是故无有利益。

6、佛化度众生，神器利用，悉皆备足。

譬如日出，有目则睹，盲者不见；设使有目而无日者，则无所睹。

佛明亦如是。

7、佛世界因缘不断。

a、菩萨于众生中，种种因缘赞叹佛道，令众生发阿耨多罗三藐三菩提心，渐渐行六波罗蜜，然后于诸世界各作佛：

若于一国次第作佛，或于异国各自作佛，是名「不断佛国」。

b、菩萨疾集智慧具足，作佛，度无量众生；欲入涅槃时，为菩萨受记：我灭度后，你次作佛。展转皆悉如是，令不断绝。

若佛不记菩萨者，则断佛国！譬如王立太子，展转如是，国祚不断。

- 8、若离有佛国者，虽受人天乐，而不知是佛恩力之所致，与畜生无异！若一切诸佛不出世者，则无三乘涅槃之道，常闭在三界狱，永无出期；
- 9、若世有佛，众生得出三界牢狱。  
譬如二国之间，无日之处，是中众生从冥中生，从冥中死。
- a、若佛生时，光明暂照，各各相见；  
乃见日月所照众生，知彼为大福、我等有罪。  
如是或时佛以光明遍照诸佛国，  
有佛国众生见佛光明，则大欢喜；念言：我等黑暗，彼为大明。
- b、有佛之国，众生知有罪福，人受三皈、五戒、八斋及出家五众等，种种甚深禅定、智慧，四沙门果，有余、无余涅槃等，如是种种善法。  
以是因缘故，佛国为贵。
- c、若佛国众生虽不见佛，值遇经法，修善持戒，布施、礼敬等，种涅槃因缘，乃至畜生皆能种福德因缘；
- d、若无佛之国，乃至天、人不能修善。

以是故，菩萨生愿：欲使佛世界不断。

二十四、菩萨摩訶萨欲住内空、外空、内外空、空空、大空、第一义空、有为空、

无为空、毕竟空、无始空、散空、性空、自相空、诸法空、不可得空、

无法空、有法空、无法有法空，当学般若波罗蜜。

（请阅无上菩提第二册）

二十五、菩萨摩訶萨欲知诸法因缘、次第缘、缘缘、增上缘，当学般若波罗蜜。

1、一切有为法，皆从四缘生，所谓因缘、次第缘、缘缘、增上缘。

a、因缘者，相应因、共生因、自种因、遍因、报因，是五因，名为因缘。

一切有为法，亦名因缘。

b、次第缘者，除阿罗汉过去、现在末后心心数法，

诸余过去、现在心心数法，能与次第，是名次第缘。

c、缘缘 d、增上缘者，一切法。

2、般若波罗蜜，于一切法无所舍、无所破，毕竟清静，无诸戏论。

佛说有四缘，但以少智之人，着于四缘而生邪论；

为破着故，说言诸法实空，无所破。

a、如心法从内、外处因缘和合生，是心如幻、如梦，虚诳，无有定性；

心数法亦如是。

1是心共生心数法，所谓受、想、思等，是心数法，同相、同缘故，名为相应。心以心数法相应为因，心数法以心相应为因，是名相应因。

相应因者，譬如亲友、知识，和合成事。

2共生因者，一切有为法，各有共生因，以共生故更相佐助；

譬如兄弟同生，故互相成济。

3自种因者，过去善种，现在、未来善法因；过去、现在善种，未来善法因。不善、无记亦如是。如是一切法，各有自种因。

4遍因者，苦谛、集谛所断结使一切垢法因，是名遍因。

5报因者，行业因缘故，得善恶果报，是为报因。

是五因名为因缘。

b、心心数法次第相续无间故，名为次第缘。

c、心心数法，缘尘故生，是名缘缘。

d、诸法生时，不相障碍，是为无障。

3、菩萨行般若波罗蜜，如是观四缘，心无所着；虽分别是法，而知其空，皆如幻化；幻化中虽有种种别异，智者观之，知无有实，但诳于眼。

为分别知凡夫人法，皆是颠倒虚诳而无有实，故有四缘！

贤圣法因从凡夫法生故，亦是不实。

4、菩萨于般若波罗蜜中，无有一法定性可取故，则不可破。

以众生着因缘空法故，名为可破。

譬如小儿见水中月，心生爱着，欲取而不能得，心怀忧恼！

智者教言：虽可眼见，不可手捉；但破可取，不破可见！

5、菩萨观知诸法从四缘生，而不取四缘中定相。

四缘和合生，如水中月，虽为虚诳无所有，要从水月因缘生，不从余缘有。

诸法亦如是，各自从因缘生，亦无定实，

故说：菩萨欲如实知因缘、次第缘、缘缘、增上缘相，当学般若波罗蜜。

## 6、诸法所因，因于四缘，四缘复何所因？

若有因则无穷，若无穷则无始，若无始则无因。若然者，一切法皆应无因！

若有始，始则无所因，若无所因而有，则不待因缘。若然者，一切诸法亦不待因缘而有！

诸法从因缘生，有二种：

若因缘中先有，则不待因缘而生，则非因缘；

若因缘中先无，则无各各因缘。

以戏论四缘故，有如是等过。

如般若波罗蜜中不可得空，无如是等失。

如世间人，耳目所睹生老病死，是则为有；细求其相，则不可得。

以是故，般若波罗蜜中，但除邪见而不破四缘。

故言：欲知四缘相，当学般若波罗蜜。

二十六、菩萨摩訶萨欲知一切诸法如、法性、实际，当学般若波罗蜜。

1、诸法如，有二种：一者、各各相，二者、实相。

a、各各相者，如：地坚相；水湿相；火热相；风动相，

如是等分别诸法，各自有相。

b、实相者，

于各各相中分别，求实不可得，不可破，无诸过失。

如自相空中说：地若实是坚相者，何以故胶、蜡等与火会时，舍其自性？

有神通人，入地如水；又分散木石，则失坚相。

又破地以为微尘，以方破尘，终归于空，亦失坚相。

如是推求地相则不可得；若不可得，其实皆空，空则是地之实相。

一切别相，皆亦如是，是名为如。

2、法性者，

如前说各各法空，空有差品，是为如；同为一空，是为法性。

是法性亦有二种：

一者、用无着心分别诸法，各自有性故；

二者、名无量法，所谓诸法实相。

如经说：法性无量，声闻人虽得法性，以智慧有量故，不能无量说。

如人虽到大海，以器小故，不能取无量水，是为法性。

### 3、实际者，

以法性为实证，故为际。如阿罗汉，名为住于实际。

### 4、如、法性、实际，是三皆是诸法实相之异名。所以者何？

凡夫无智，于一切法作邪观，所谓常、乐、净、实、我等。

a、佛弟子如法本相观，是时不见常，是名无常；不见乐，是名苦；

不见净，是名不净；不见实，是名空；不见我，是名无我。

若不见常而见无常者，是则妄见，见苦、空、无我、不净亦如是，是名为如。

如者，如本，无能败坏。

是故佛说三法为法印，所谓一切有为法无常印、一切法无我印、涅槃寂灭印。如《般

若波罗蜜经》中，了了说诸法实相。

有人着常颠倒，故舍常见，不着无常相，是名法印；

非谓舍常、着无常者，以为法印；我乃至寂灭亦如是。

般若波罗蜜中，破着无常等见；非谓破不受不着。

b、得是诸法如已，则入法性中，灭诸观，不生异信，性自尔故。

譬如小儿见水中月，入水求之，不得便愁。

智者语言：性自尔，莫生忧恼！

c、善入法性，是为实际。

a、声闻法中，观诸法生灭相，是为如；

b、灭一切诸观，得诸法实相，是处说法性。

c、实际即是涅槃，为涅槃故佛说十二部经，

涅槃有种种名字说，或名为「离」，或名为「妙」，或名为「出」；

如是等则为说「实际」，但不说名字，故言无因缘。

a、诸法如者，如诸法未生时，生时亦如是，生已过去，现在亦如是；

诸法三世平等，是名为「如」。

诸法实相中，三世等一无异。

《般若波罗蜜·如品》说：过去如，未来如，现在如，如来如，一如无有异。已破生法；若无生法者，未来、现在亦无生，云何不等！

过去世无始，未来世无后，现在世无住。以是故三世平等名为「如」。

b、行是如已，入无量法性中。

法性者，「法」名涅槃，不可坏，不可戏论。

法性名为本分种，如黄石中有金性，白石中有银性；

如是一切世间法中，皆有涅槃性。

诸佛贤圣，以智慧、方便、持戒、禅定，教化引导，令得是涅槃法性。

利根者即知是诸法皆是法性；譬如神通人，能变瓦石皆使为金。

钝根者方便分别求之，乃得法性；譬如大冶鼓石，然后得金。

如水性下流，故会归于海，合为一味。

诸法亦如是，一切总相、别相，皆归法性，同为一相，是名法性。

如金刚在山顶，渐渐穿下至金刚地际，到自性乃止。

诸法亦如是，智慧分别，推求已，到如中，

从如入自性，如本末生，灭诸戏论，是名为法性。

诸法亦如是，种种别异，取舍不同，得到自性乃止；无复过处，是名法性。

c、实际者：法性名为「实」，入处名为「际」。

一一法有九种：

一者、有体；

二者、各有各法；如眼、耳虽同四大造，而眼独能见，耳无见功；

三者、诸法各有力；如火以烧为力，水以润为力；

四者、诸法各自有因；

五者、诸法各自有缘；

六者、诸法各自有果；

七者、诸法各自有性；

八者、诸法各有限碍；

九者、诸法各各有开通方便。

诸法生时，体及余法，凡有九事。

a、知此法各各有体法具足，是名世间下如。

知此九法终归变异尽灭，是名中如。

譬如此身生，从不净出，虽澡浴，终归不净。

是法非有非无、非生非灭，灭诸观法，究竟清净，是名上如。

有佛无佛，如、法相、法位，常住世间，所谓无明因缘诸行，常如本法。

b、法性者，是九法中性。

c、实际者，九法中得果证。

诸法实相，常住不动。

众生以无明等诸烦恼故，于实相中转异邪曲；

a、诸佛贤圣种种方便说法，破无明等诸烦恼，令众生还得实性，如本不异，名为如。

b、实性与无明合，故变异则不清净；若除却无明等，得其真性，是名法性清净。

c、实际名入法性中，知法性无量无边，最为微妙，更无有法胜于法性，

出法性者，心则满足，更不余求，则便作证。

譬如行道，日日发引而不止息，到所至处，无复去心；行者住于实际，亦复如是。

如罗汉、辟支佛住于实际，纵复恒沙诸佛为其说法，亦不能更有增进，又不复生三界。

若菩萨入是法性中，悬知实际，若未具足六波罗蜜、教化众生，尔时若证，妨成佛道；是时菩萨以大悲精进力故，还修诸行。

a、知诸法实相中无有常法，无有乐法，无有我法，无有实法，亦舍是观法；如是等一切观法皆灭，是为诸法实如涅槃，不生不灭，如本末生。

譬如水是冷相，假火故热；若火灭热尽，还冷如本。

用诸观法，如水得火；若灭诸观法，如火灭水冷，是名为如。

b、如实常住，何以故？诸法性自尔。

譬如一切色法皆有空分，诸法中皆有涅槃性，是名法性。

c、得涅槃种种方便法中皆有涅槃性。若得证时，如、法性则是实际。

b、法性者，无量无边，非心心数法所量，是名法性。

c、妙极于此，是名真际。

二十七、菩萨摩訶萨欲数知三千大千世界中大地诸山微尘，当学般若波罗蜜。

二十八、菩萨摩訶萨欲析一毛为百分，欲以一分毛，尽举三千大千世界中大海江河池泉

诸水，而不扰水性者，当学般若波罗蜜。

二十九、三千大千世界中，诸火一时皆燃，譬如劫尽烧时；

菩萨摩訶萨欲一吹令灭者，当学般若波罗蜜。

三十、三千大千世界中，诸大风起，欲吹破三千大千世界及诸须弥山，如摧腐草；菩萨

摩訶萨欲以一指障其风力令不起者，当学般若波罗蜜。

1、众生有二种：一者、乐善法，为乐善法者，赞叹诸功德；

二者、乐善法果报，为乐善法果报者，赞叹大神力。

2、四大之名，其实亦无边无尽，常在世故，无能悉动量其多少，人虽造作城廓台殿，所用甚少，地之广大，载育万物，最为牢固。

是故佛说：三千大千世界中地及须弥诸山微尘，皆欲尽知其数，及一一微尘中众生

业因缘，各有各分，欲知其多少，当学般若波罗蜜。

一石土之微尘，尚难可数，何况三千大千世界地及诸山微尘之数？

声闻、辟支佛智慧尚不能知，何况凡夫！是事诸佛及大菩萨所知。

3、无量者，随人心说。

如大海水名为无量，而深八万由旬，如大身阿修罗王，量其多少，不以为难。

4、云何行般若波罗蜜得是智慧？

有人行般若波罗蜜，灭诸烦恼及邪见戏论，入菩萨甚深禅定，念智清静增广故，则能分别一切诸色微尘，知其量数。

诸佛及大菩萨，得无碍解脱故，过于是事，尚不以为难，何况于此！

有人为地为坚牢；心无形质，皆是虚妄。

以是故，佛说：心力为大；

a、行般若波罗蜜故，散此大地以为微尘。

以地有色、香、味、触重故，自无所作；水少香故，动作胜地；

火少香、味故势胜于水；风少色、香、味故，动作胜火；

心无四事故，所为力大。

又以心多烦恼结使系缚故，令心力微少。

有漏善心，虽无烦恼；以心取诸法相故，其力亦少。

二乘无漏心，虽不取相，以智慧有量；及出无漏道时，六情随俗分别，取诸法相故，不尽心力。

诸佛及大菩萨，智慧无量无边，常处禅定，于世间涅槃无所分别。

诸法实相，其实不异，但智有优劣；

行般若波罗蜜者，毕竟清净，无所罣碍，一念中能数十方一切如恒河沙等三千大千世界、大地诸山微尘，何况十方各一恒河沙世界！

若离般若波罗蜜，虽得神通，则不能如上所知。

以是故说：欲得是大神力，当学般若波罗蜜。

b、一切诸物中，水为最大。所以者何？大地上下四边，无不有水。

若护世天主不节量天龙雨，又无消水珠者，则天地漂没。

又以水因缘故，世间众生数、非众生数皆得生长。以是可知水为最大。

是故佛说：菩萨欲知水滲多少，滲滲分散令无力者，当学般若波罗蜜。

c、火为最大。所以者何？除香、味故。

又以水出处甚多，而火能灭之，大火之力，能烧万物，能照诸暗；

以是故知火为最大。

是故佛说：菩萨欲吹灭大火者，当学般若波罗蜜。

d、火因于风，乃得燃炽，虽复相因，过则相灭。

菩萨行般若波罗蜜，因禅定得神通，能变身令大，口风亦大，故能灭之。

又以神力，小风能灭；譬如小金刚，能摧破大山。

以是故，诸天世人见此神力，皆悉宗伏。

菩萨以火为害处广，怜悯众生故，以神力灭之。

又以三千世界成立甚难，菩萨福德智慧故，力能制之。

于四大中风力最大，无色、香、味故，动相最大。所以者何？

如虚空无边，风亦无边，一切生育成败，皆由于风，大风之势，摧碎三千大千世界

诸山。

是故佛说：能以一指障其风力，当学般若波罗蜜。

所以者何？般若波罗蜜实相，无量无边，能令指力如是。

三十一、菩萨摩訶萨欲一结加趺坐，遍满三千大千世界中虚空者，当学般若波罗蜜。

1、菩萨以何因缘故，如是结加趺坐？

以梵天王主三千世界，生邪见心，自以为大；

见菩萨结加趺坐遍满虚空，则憍慢心息。

2、又于神通力中巧方便故，一能为多，多能为一；小能作大，大能作小。

3、亦为欲现希有难事故，坐遍虚空。

4、亦为遮诸鬼神龙王恼乱众生故，坐满虚空，令众生安隐。

如难陀婆难陀龙王兄弟，欲破舍卫城，雨诸兵杖、毒蛇之属；

是时目连端坐，遍满虚空，变诸害物，皆成华香、瓔珞。

故说：菩萨摩訶萨欲一结加趺坐，遍满三千大千世界虚空，当学般若波罗蜜。

三十二、菩萨摩訶萨欲以一毛举三千大千世界中诸须弥山王，

掷过他方无量阿僧祇诸佛世界，不扰众生者，当学般若波罗蜜。

1、菩萨何故举须弥山及诸山，过着他方无量世界？此明菩萨神力能举。

2、诸菩萨为佛当说法故，先庄严三千大千世界，除诸山令地平整。

如《法华经》中说：佛欲集诸化佛故，先平治地。

3、亦欲现希有事，令众生见故。所以者何？一须弥山，高八万四千由旬；

若举此一山，已为希有，何况三千大千世界百亿须弥山！

若以一毛举三千大千世界百亿须弥山尚难，

何况以一毛头，掷百亿须弥山过无量阿僧祇世界！

众生见菩萨希有事，皆发阿耨多罗三藐三菩提心，

作是念言：是菩萨未成佛道，神力乃尔，何况成佛。

三十三、欲以一食，供养十方各如恒河沙等诸佛及僧，当学般若波罗蜜。

欲以一衣、华香、瓔珞、末香、涂香、烧香、灯烛、幢幡、华盖等，供养诸佛

及僧，当学般若波罗蜜。

何故菩萨以一食供养十方如恒河沙等诸佛及僧？

1、供养功德，在心不在事。

2、菩萨以一食大心，悉供养十方诸佛及僧，亦不以远近为碍；是故诸佛皆见皆受。

3、诸佛有一切智故，皆见皆受；僧无一切智，虽不见不知，而其供养，施者得福。譬

如有人遣使供养彼人，彼人虽不得，而此人已获施福。

4、如慈三昧，于众生虽无所施，而行者功德无量。

5、诸菩萨无量无尽功德成就，以一食供养十方诸佛及僧，皆悉充足，而亦不尽；

譬如涌泉出而不竭。

如文殊师利以一钵欢喜丸供养八万四千僧，皆悉充足，而亦不尽。

6、菩萨于此以一钵食供养十方诸佛，而十方佛前饮食之具，具足而出。

譬如鬼神，得人一口之食，而千万倍出。

7、菩萨行般若波罗蜜，得无量禅定门，及得无量智慧方便门，是故无所不能。

8、以般若波罗蜜无碍故，是菩萨心所作亦无碍。

是菩萨能供养十方千万恒河沙等诸佛及僧，何况各如一恒河沙！

衣服、华香、瓔珞，末香、涂香、烧香，灯烛、幢幡、华盖等亦如是。

三十四、菩萨摩訶萨欲使十方各如恒河沙等世界中众生，悉具于戒、三昧、智慧、解脱、

解脱知见，令得须陀洹果、斯陀含果、阿那含果、阿罗汉果，乃至令得无余涅

槃，当学般若波罗蜜。

须陀洹果有二种：

一者、佛说三结断，得无为果；阿毘昙说：八十八结断，得无为须陀洹果。

二者、信行、法行人，住道比智中，得须陀洹果证者是。

「须陀洹」名入流，入八圣道，流入涅槃，是名初观诸法实相，得人无量法性分，堕圣

人数中。

「斯陀含」名一来；是人从此死，生天上，天上一来，得尽众苦。

「阿那含」名不来；是人欲界中死，生色界、无色界中，于彼漏尽不复来生。

「阿罗汉」名无生，尽一切烦恼故，应受一切天龙、鬼神供养。

「无余涅槃」名阿罗汉舍此五蕴，更不复相续受后五蕴，身心苦皆悉永灭。

三十五、菩萨摩訶萨行般若波罗蜜布施时，

应作如是分别：如是布施，得大果报；

如是布施，得生刹利大姓、婆罗门大姓、居士大家；

如是布施，得生四天王天处、三十三天、夜摩天、兜率陀天、化乐天、他化自在天；

因是布施，得人初禅、二禅、三禅、四禅，无边空处、无边识处、无所有处、非有想非

无想处；

因是布施，能生八圣道分；

因是布施，能得须陀洹道乃至佛道，当学般若波罗蜜。

1、菩萨摩訶萨知诸法实相无取无舍、无所破坏，行不可得般若波罗蜜，以大悲心还修

福行；福行初门，先行布施。

2、菩萨行般若波罗蜜，智慧明利，能分别施福；

a、施物虽同，福德多少随心优劣。

例：舍利弗以一钵饭上佛供养，

佛即回施狗而问舍利弗：你以饭施我，我以饭施狗，谁得福多？

舍利弗言：如我解佛法义，佛施狗得福多。

舍利弗于一切人中智慧最上，而佛福田最为第一，不如佛施狗、得福多。

以是故，知大福从心生。

福田妙，得福多，而舍利弗施佛得福不及佛施狗，

以施良田，虽得福多，而不如心；所以者何？心为内主，田是外事故。

b、或时布施之福在于福田；

如二十亿耳，昔以一华施于佛塔，九十一劫人、天中受乐，余福德力得阿罗汉。如

阿育王宿世为小儿时，以土施佛；今生为阎浮提王，起八万塔，最后得道。

施物至贱，小儿心薄，但以福田妙故，得大果报，当知大福从良田生。

3、若大中之上，三事都具：心、物、福田，三事皆妙；

4、如以般若波罗蜜心布施，无所着故，得大果报。

5、为涅槃故施，亦得大报；以大悲心为度一切众生故布施，亦得大报。

大果报者，生刹利家，乃至得佛者是。

6、云何布施得生刹利家乃至得佛？

若有人布施及持戒故，得人天中富贵。

a、如有人至心布施、持戒故，生刹利家；刹利者，王及大臣。

b、若着于智慧经书而不恼众生布施、持戒故，生婆罗门家。

c、若布施、持戒减少，而乐着世乐，生居士大家；居士者，小人而巨富。

d、若布施、持戒，清净小胜，厌患家业，好乐听法，供养善人，生四天王处。

所以者何？在彼有所须欲，心生皆得；常见此间贤圣善人，心生供养，以近修福

处故。

e、若布施、持戒清净，供养父母及其所尊，心欲求胜，生三十三天。

f、若布施、持戒清净，而好学问，其心柔和，生夜摩天。

g、若布施、持戒清净，令二事转胜，好乐多闻，分别好丑，爱乐涅槃，心着功德，

生兜率天。

h、若布施、深心持戒、多闻、好乐学问，自力生活，生化乐天。

i、若布施时，清淨持戒转深，好乐多闻，自贵情多，不能自苦，从他求乐，生他化自在天。他所思惟，勤心方便，化作女色五欲，夺而自在。

譬如平民，苦身自作业，王强力夺之。

布施时，以愿因缘故生天上。

有人少行布施、持戒，不知禅定，是人闻有四天王天，心常志愿。

乃至他化自在天亦如是。

j、有人布施、持戒，修布施时，其心得乐，若施多、乐亦多；

如是思惟，舍五欲，除五盖，入初禅，乃至非有想非无想天如是。

k、有人布施佛及佛弟子，从其闻说道法；

是人因此布施故，心得柔软，智慧明利，即生八圣道分，断三结，得须陀洹果，乃至佛道亦如是。

l、因是布施闻其说法，便发阿耨多罗三藐三菩提心。

7、未离欲布施，生人中富贵，及六欲天中；

若离欲心布施，生梵世天上乃至广果天；

若离色心布施，生无色天中；

离三界布施为涅槃故，得声闻道；

布施时厌恶愤闹，好乐闲静，喜深智慧，得辟支佛；

布施时起大悲心，欲度一切，为第一甚深毕竟清净智慧，得成佛道。

三十六、菩萨摩訶萨行般若波罗蜜布施时，以慧方便力故，能具足檀波罗蜜、

尸罗波罗蜜、羼提波罗蜜、毘梨耶波罗蜜、禅波罗蜜、般若波罗蜜。

菩萨摩訶萨云何布施时，以慧方便力故，具足檀波罗蜜，乃至般若波罗蜜？

施人、受人、财物不可得故，能具足檀波罗蜜；

罪、不罪不可得故，具足尸罗波罗蜜；

心不动故，具足羼提波罗蜜；

身心精进不懈息故，具足毘梨耶波罗蜜；

不乱不味故，具足禅波罗蜜；

知一切法不可得故，具足般若波罗蜜。

1、慧方便，所谓三事不可得者是。

2、慧方便者，能成就其事，无所破坏、更无所作；

有二种不可得：一者、得不可得，二者、不得不可得。

a、得不可得者，堕于断灭；

b、若不得不可得者，是为慧方便，不堕断灭。

a、若无慧方便布施者，取三事相；若以三事空，则取无相。

b、有慧方便者，从本以来不见三事相，以是故慧方便者，不堕有无中。

3、布施时坏诸烦恼，是名慧方便。

4、于一切众生，起大悲心布施，是名慧方便。

5、过去、未来无量世所修福德布施，回向阿耨多罗三藐三菩提，亦名慧方便。

6、于一切十方三世诸佛及弟子所有功德，忆念随喜布施，回向阿耨多罗三藐三菩提，

是名慧方便。

如是等种种力，是为慧方便义。

乃至般若波罗蜜慧方便亦如是。

三十七、菩萨摩訶萨欲得过去、未来、现在诸佛功德者，当学般若波罗蜜。

1、欲得如三世佛功德无所减少！所以者何？一切佛功德皆等，无多无少。

2、诸佛世界种种，有净、不净、有杂。

如《三十三天品经》说：佛在三十三天安居。

自恣时至，四众久不见佛，愁思不乐。

遣目连白佛言：世尊！云何舍此众生住彼天上？

时佛告目连：你观三千世界！

目连以佛力故观，

或见诸佛为大众说法，或见坐禅，或见乞食，如是种种施作佛事。

目连即时五体投地，是时须弥山王，踊跃大动，诸天皆大惊怖。

目连涕泣，稽首白佛：佛有大悲，不舍一切，作如是种种化度众生！

佛告目连：你所见甚少，过你所见；

东方有国，纯以黄金为地，彼佛弟子，皆是阿罗汉，六通无碍。

复过是东方有国纯以白银为地，彼佛弟子皆学辟支佛道。

复过是东方有国纯以七宝为地，其地常有无量光明；彼佛所化弟子纯诸菩萨，皆得陀罗尼、诸三昧门，住阿鞞跋致地。

目连！当知彼诸佛者，皆是我身。

如是等东方恒河沙等无量世界，有庄严者，不庄严者，皆是我身而作佛事。

如东方，南、西、北方，四维、上下，亦复如是。

以是故，当知释迦文佛，更有清净世界如阿弥陀国；

阿弥陀佛，亦有严净、不严净世界，如释迦文佛国。

3、诸佛大悲，彻于骨髓，不以世界好丑，随应度者而教化之；

如慈母爱子，子虽没在便厕，勤求拯拔，不以为恶。

三十八、菩萨摩訶萨欲到有为、无为法彼岸者，当学般若波罗蜜。

1、彼岸者，于有为、无为法尽到其边。

云何是彼岸？以大智慧悉知悉尽有为法总相、别相种种悉解；

2、无为法中，从须陀洹至佛，悉皆了知。

三十九、菩萨摩訶萨欲知过去、未来、现在诸法如、诸法法相、无生际者，当学般若波

罗蜜。

1、前说诸法如，今说三世皆如；法相即是法性；无生际即是实际。

2、过去法如，即是过去法相；未来、现在亦如是。

过去法如，即是未来、现在法如；

现在法如，即是过去、未来法如；

未来法如，即是过去、现在法如。所以者何？如相非一、非异故。

3、如先说二种如：一者、世间如；二者、出世间如。

用是世间如，三世各各异；

用是出世间如，三世为一。

4、法相名诸法业，诸法所作、力、因、缘、果、报。

如火为热相，水为湿相；如是诸法中分别因、缘、果、报，各各别相。

是名世间法相。

5、若是诸法相推求寻究，入无生法中，更无过是者，是名无生际。

6、生法者，过去、现在是；

无生法者，未来及无为法是。

三世一相，所谓无相；如是则无生相。

无生名为涅槃，以涅槃不生不灭故。

涅槃者，末后究竟，不复更生，而一切法即是涅槃；

以是故佛说：一切法皆是无生际。

四十、菩萨摩訶萨欲在一切声闻、辟支佛前，欲给侍诸佛，欲为诸佛内眷属，欲得大眷

属，欲得菩萨眷属，欲得净报大施，当学般若波罗蜜。

1、菩萨初发意时，已在一切众生前，何况积劫修行！

是菩萨功德智慧大故，世世常大，能利益声闻、辟支佛。

2、众生知菩萨恩故，推崇敬重，乃至畜生中亦为尊重。

a、如菩萨昔作鹿，其色如金，其角七宝，五百鹿随逐宗事。

b、若在人中，好世作转轮圣王，恶世恒作大王，护持佛法，利益众生。

c、若出家，值有佛法则为世作大度师，兴显佛法；

若无佛法，则为外道大师，行四无量。

d、阿罗汉、辟支佛，虽有无漏，利益事少。譬如一升酥虽精，不如大海水酪。

e、菩萨虽有漏智慧，及其成熟，利益无量。

f、罗汉、辟支佛四事供养助道之具，多由菩萨得。

如《首楞严三昧经》说：文殊师利七十二亿作辟支佛，化辟支佛人，令其成道。

以是故，在声闻、辟支佛前。

3、欲为诸佛给使者，

如释迦文佛未出家时，

a、车匿给使，优陀耶戏笑；瞿毘耶、耶输陀等诸婣女，为内眷属。

出家六年苦行时，五人给侍。

得道时，弥喜、罗陀、须那刹多罗、阿难、密迹力士等，是名内眷属。

b、大眷属者，舍利弗、目犍连、摩诃迦叶、须菩提、迦旃延、富楼那、阿泥卢豆等诸

圣人，及弥勒、文殊师利、跋陀婆罗，诸阿鞞跋致一生补处菩萨等，是名大眷属。

4、佛有二种身：一者、法性生身，二者、随世间身。

世间身眷属，如上。

法性生身者，有无量无数阿僧祇一生补处菩萨侍从。所以者何？

如《不可思议解脱经》说：

佛欲生时，八万四千一生补处菩萨在前导，菩萨从后而出；譬如阴云笼月。

法华经说：从地踊出菩萨等，皆是内眷属、大眷属。

5、菩萨眷属者，

有佛，纯以菩萨为眷属；

有佛，纯以声闻为眷属；

有佛，菩萨、声闻杂为眷属。

是故言但欲得菩萨为眷属者，当学般若波罗蜜。

6、眷属有三：上、中、下

下者纯声闻，中者杂，上者但菩萨。

7、净报大施者，

菩萨行般若波罗蜜，诸法皆空不可得，何况诸结使！

菩萨入法性中故，不证真际，是故能净报施福。

a、菩萨功德广大，从发心已来，欲代一一众生受一切苦，欲以一切功德与一切众生，然后当自求佛道。

但是事不可得故，而自成佛，度一切众生。

b、又菩萨志愿，不以阿僧祇为拘；如世间及如、法性、实际、虚空等久住。

c、菩萨心住世间，利益众生故，亦如是久住，无有穷已。

是人不能净报施福者，谁能净毕！

d、如父母虽有结使诸恶，以一世利益子故，受其供养，令子得大福，何况菩萨无诸结使，而住无边世中利益众生，而不净毕？

又复菩萨但有悲心而无般若，尚能利益，何况行般若波罗蜜！

8、若菩萨无结使，云何世间受生？

菩萨得无生法忍，得法性生身，处处变化以度众生，庄严世界。

是功德因缘故，虽未得佛，能净报施福。

四十一、菩萨摩訶萨欲不起慳心、破戒心、瞋恚心、懈怠心、乱心、痴心者，当学般若

波罗蜜。

1、是六种心恶故，能障蔽六波罗蜜门。

a、如菩萨行布施时，若有慳心起，令布施不清净，

所谓不能以好物施；若与好物，不能多与；若与外物，则不能内施；

若能内施，不能尽与；皆由慳心故。

菩萨行般若波罗蜜，知一切法无我、无我所，诸法皆空，如梦、如幻；

以身、头、目、骨髓布施，如施草木。

是菩萨虽未得道，欲常不起是慳心，当学般若波罗蜜。

b、诸余人离欲得道故，不生破戒心。

菩萨行般若波罗蜜故，不见破戒事。所以者何？

戒为一切诸善功德住处，譬如地为一切万物所依止处；

破戒尚不得余道，何况得阿耨多罗三藐三菩提！故不生破戒心。

复作是念：菩萨法者，安乐众生，若破戒者，恼乱一切。

是故菩萨不生破戒心，何况破戒！

c、小乘及诸凡夫，尚不应生瞋恚心，何况菩萨发阿耨多罗三藐三菩提意！

身为苦器，法自受恼；譬如犯罪之人，自致刑戮，自作自受，不应怨人。

但当自护其心，不令起恶！譬如人遭恶风雨寒热，亦无所瞋。

复作是念：菩萨求佛，以大悲为本，若怀瞋恚，则丧志愿。

瞋恚之人，尚不得世间乐，何况道乐！瞋恚之人，自不得乐，何能以乐与人！

d、懈怠之人，世间胜事尚不能成，何况得阿耨多罗三藐三菩提！

譬如钻火数息，无得火期。

e、散乱之心，譬如风中燃灯，虽有光明，不能照物；乱心中智慧，亦复如是。

智慧是一切善法根本，若欲成就是智，先当摄心，然后可成。

譬如狂醉之人，自利他利、好丑之事，都不觉知；

散乱之心亦如是，世间好事，尚不能善知，何况出世间法！

f、愚痴人心，一切成败事，皆不能及，何况微妙深义！

譬如无目之人，或坠沟坑，或入非道；无智之人，亦复如是。

无智慧眼故受着邪法，不受正见。

如是之人，世间近事，尚不能成，何况成就阿耨多罗三藐三菩提！

菩萨行般若波罗蜜力故，能障是六蔽，净六波罗蜜。

故说若欲不起六蔽，当学般若波罗蜜。

四十二、菩萨摩訶萨欲使一切众生，立于布施福处，持戒福处，修定福处，劝导福处，

欲令众生立于财福、法福处，当学般若波罗蜜。

1、福者，善有漏身、口、意业。善有漏业因缘果报故，得是不隐没无记福。

是果报亦名为福；如世间人说能成大事，多所成办，是名福德人。

是福略说三种：布施、持戒、修定。

2、何等是布施？

a、有人以衣服、卧具，饮食，花香、瓔珞等与人，是名布施。

b、饮食等物非布施，以饮食等物与时，心中生法名舍，与悭心相违，

是名布施福德。

是舍法相应思，是名布施福德。所以者何？业能生果报故。

思即是业，身口不名为业，从思生故得名业。

c、布施有二种：一者、净，二者、不净。

不净者，直施而已：

或畏失财故与；或恶诃骂故与；或无用故与；或亲爱故与；或为求势故与，以施

故多致势援；或死急故与；或求善名誉故与；或求与贵胜齐名故与；或妒嫉故与；

或僇慢故与，或为咒愿福德故与；或求吉除凶故与；

或求人伴佻故与；或不一心、不恭敬、轻贱受者而与。

如是种种因缘，为今世事故施，与净相违，名为不净。

净施者：治心故施；庄严意故施；为得第一利故施，生清净心，能分别为助涅槃故

施。譬如新花未萎，色好且香；净心布施，亦复如是。

诸天若不净心布施者，宫殿光明薄少；若净心布施者，宫殿光明增广。

此布施业，虽过去乃至千万世中不失，譬如券要。

d、此布施福云何增长？

应时施故，得福增长。

饥饿时施，得福增多；或远行来时，若旷路险道中施，若常施不断，或时常念施，故施福增广。

若大施故得福多，若施好人，若施佛，若施者、受者清净故，若决心施，若自以力致财施，若随所有多少能尽施，若交以物施，若以园田使人等施。如是布施，唯有菩萨能以深心行之。

如萨婆达多王，自缚其身，施婆罗门。

如尸毘王为一鸽故，自持其身，以代鸽肉。

如菩萨曾为兔身，自炙其肉，施与仙人。

如施婆罗门持一瓶酪施僧，世世受乐，今得阿罗汉，诸受乐中受乐第一。

如末利夫人，供养须菩提故，得今世果报，为波斯匿王后。

3、持戒福处者，佛说五戒福者是。

4、修定福处者，

修慈是修定福，有漏禅定能生果报者，总名修定福。

以欲界多瞋多乱故，先说慈心为修定福。

得慈方便，愿与众生乐，后实见受乐，是心相应法，名为慈法。

根本四禅中，过四禅亦有慈；依止四禅得者，牢固有力。

慈应言亲爱，无怨无诤故，名为亲爱；

能缘无量众生故，名为无量；

能利益众生，能离欲故，名为梵行。

四无量中，慈心能生大福德。

悲心忧愁故，舍福德；喜心自念功德故，福德不深；舍心放舍，故福亦少。

佛说慈心有五利，不说余。何等五？

一者、刀不伤；二者、毒不害；三者、火不烧；四者、水不没；

五者、于一切瞋怒恶害众生中，见皆欢喜。

悲心等三事不尔，故说修定福为慈。

5、劝导福处者，

若比丘不能坐禅，不能诵经，教化劝导修立福德；

或有比丘能坐禅、诵经，见诸比丘衣食乏少，力能引致，亦行劝导。及诸菩萨怜悯众生故，以福德因缘劝化之。

又出家人，若自求财，于戒有失，是故劝导以为因缘。

6、财福者，衣服、饮食，卧具、医药，金银、车马、田宅等。

布施者，总摄一切施：财施、法施，俗施、道施。

法施者，如佛以大慈故，初转法轮，无量众生得道；舍利弗逐佛转法轮；

余诸圣人，虽非转法轮，亦为众生说法得道，亦名法施。

普贤菩萨，观世音、得大势、文殊师利、弥勒菩萨等，以二种神通力：果报神通，修得神通，住是中，以福德、方便力，光明、神足等，种种因缘开度众生，亦名法施。

诸辟支佛飞腾虚空而说一偈，引导众生，令植善根，亦名法施。

佛弟子未得圣道者，坐禅、诵经，不坏诸法相，教化弟子，皆名法施。

如是等种种，名为法施相。

故说菩萨欲立众生于六种施福者，当学般若波罗蜜。

四十三、菩萨摩訶萨欲得五眼者，当学般若波罗蜜。

何等五？肉眼、天眼、慧眼、法眼、佛眼。

1、肉眼，见近不见远，见前不见后，见外不见内，见昼不见夜，见上不见下；  
2、以此碍故，求天眼。

得是天眼，远近皆见，前后、内外，昼夜、上下，悉皆无碍。

3、是天眼见和合因缘生假名之物，不见实相，所谓空、无相、无作，无生、无灭，如前，中、后亦尔；为实相故，求慧眼。

得慧眼，不见众生，尽灭一异相，舍离诸着，不受一切法，智慧自内灭，是名慧眼。  
4、但慧眼不能度众生！所以者何？无所分别故，是故求法眼。

法眼令是人行是法，得是道，知一切众生各各方便门，令得道证。

5、法眼不能遍知度众生方便道，以是故求佛眼。

佛眼无事不知，覆障虽密，无不见知；于余人极远，于佛至近；

于余幽暗，于佛显明；于余为疑，于佛决定；于余微细，于佛为粗；

于余甚深，于佛甚浅。

是佛眼，无事不闻，无事不见，无事不知，无事为难，无所思惟，一切法中，佛眼常照。

四十四、菩萨摩訶萨欲以天眼见十方如恒河沙等世界中诸佛，

欲以天耳闻十方诸佛所说法，欲知诸佛心，当学般若波罗蜜。

天眼法所见，不过三千大千世界；

1、以般若波罗蜜力，故见十方恒河沙等国中诸佛。所以者何？

般若波罗蜜中，无近无远，无所罣碍故。

2、般舟三昧，离欲人、未离欲人俱得；天眼但是离欲人得。

般舟三昧，忆想分别，常修常习故见；

天眼修神通，得色界四大造色眼，四边得遍明相，是为差别。

天眼功易，譬如日出，见色不难；

三昧功难，如夜燃灯，见色不易。天耳亦如是。

3、知诸佛心者，

以佛神力故令菩萨知。

般若波罗蜜无碍相，粗细、深浅、愚圣，都无差别。

诸佛心如、菩萨心如，一如无异；菩萨随是如故，能知诸佛心。

希有难事，不应知而知；

故言欲得是者，当学般若波罗蜜。

四十五、欲闻十方诸佛所说法，闻已乃至阿耨多罗三藐三菩提不忘者，当学般若波罗蜜。

1、菩萨以闻持陀罗尼力故能受，坚忆念陀罗尼力故不忘。

2、以般若波罗蜜力，毕竟清净无所着；譬如大海，含受众流。

3、菩萨从十方诸佛所闻法，以般若波罗蜜器大故，能受无量法，持而不忘。

是般若波罗蜜，不可譬喻、如虚空。

如劫烧尽已，大雨弥漫，是雨除虚空，更无处能受；

十方诸佛说法雨，从佛口出，除行般若波罗蜜菩萨，更无能受者。

故言欲闻十方诸佛说法，当学般若波罗蜜。

四十六、菩萨摩訶萨欲见过去、未来诸佛世界，及见现在十方诸佛世界，当学般若波罗

蜜。

菩萨未深入禅定，若见十方世界山河、草木，心则散乱；故但观诸佛。行者但观诸佛，不观土地、山河、树木，得禅定力已，随意广观。

1、诸清净佛国难见，故言欲见诸佛国，当学般若波罗蜜。

2、又一佛有无量百千种世界，有严净、有不严净、有杂；有毕竟清净世界，难见故，以般若波罗蜜力，乃能得见。

譬如天子开放正殿，则外人可见；内殿深宫，无能见者。

3、菩萨有见过去、未来三昧，人是三昧已，见过去、未来事，如梦中所见。

4、菩萨有不灭际三昧，人是三昧已，不见诸佛有灭者。

此是智慧，假名为眼；如转法轮中，于四谛中得眼、智、明、觉。

5、菩萨见十方现在佛世界，定知过去、未来诸佛世界亦尔。所以者何？

一切诸佛功德同故。

6、是般若波罗蜜中，如现在、过去、未来，等无异，一如、一法性故。

四十七、菩萨摩訶萨欲闻十方诸佛所说十二部经：

修多罗、祇夜、受记经、伽陀、优陀那、因缘经、阿波陀那、如是语经、本生经、广经、未曾有经、论议经，诸声闻等闻与不闻，尽欲诵受持者，当学般若波罗蜜。

说尽欲闻十方诸佛所说法者，当学般若波罗蜜。

所说法者，即此十二部经。

1、诸经中直说者，名修多罗，所谓四阿含，诸摩訶衍经，及二百五十戒经；

出三藏外亦有诸经，皆名修多罗。

2、诸经中偈（重颂），名祇夜。

3、众生九道中受记，所谓三乘道、六趣道。

此人经尔所阿僧祇劫，当作佛，若记尔所岁当作佛；

记声闻人今世、后世得道；记辟支佛但后世得道；记余六道，亦皆后世受报。

诸佛法，欲与众生受记，

先皆微笑，无量种光从四牙中出，所谓青、黄、赤、白、缥、紫等。

从上二牙出者，光照三恶道。

从其光明演无量法，说一切作法无常，一切法无我，安隐涅槃；

众生得遇斯光、闻说法者，身心安乐，得生人中天上，从是因缘皆得毕苦。

从下二牙出者，上照人、天，乃至有顶禅，若聋盲、瘖哑、狂病，皆得除愈；

六欲天人及阿修罗受五欲乐，遇佛光明，闻说法声，皆厌患欲乐，身心安隐；

色界诸天受禅定乐时，遇佛光明，闻说法声，亦生厌患，来诣佛所。

此诸光明，复至十方，遍照六道，作佛事已，还绕身七匝。

若记地狱，光从足下入；若记畜生，光从膝入；若记饿鬼，光从髀入；

若记人道，光从齐入；若记天道，光从胸入；若记声闻，光从口入；

若记辟支佛，光从眉间相入；若记得佛，光从顶入。

若欲受记，先现此相，然后阿难等诸弟子发问。

4、一切偈名祇夜，六句、三句、五句，句多少不定，亦名祇夜，亦名伽陀。

5、优陀那者，无问自说，名有法、佛必应说而无有问者，佛略开问端。

如佛在舍婆提、毘舍佉堂上，阴地经行，自说优陀那，所谓「无我、无我所，是事

善哉！」

尔时一比丘合掌白佛言：世尊！云何『无我、无我所，是事善哉』？

佛告比丘：凡夫人未得无漏道，颠倒覆心故，于无我、无我所，心大惊怖。若佛及佛弟子闻好法者，欢喜奉行，无颠倒故，不复更作。

是名优陀那。

6、尼陀那者，本事，说诸佛法本起因缘，佛何因缘说此事：

修多罗中，有人问故，为说是事；毘尼中，有人犯是事，故结是戒。

一切佛语缘起事，皆名尼陀那。

7、阿波陀那者，与世间相似柔软浅语；

如《中阿含》中《长阿波陀那经》，《长阿含》中《大阿波陀那》，

毘尼中亿耳阿波陀那，二十亿阿波陀那，解二百五十戒经中欲阿波陀那一部，菩萨阿波陀那出一部。如是等无量阿波陀那。

8、如是语经者，有二种：

一者、结句，言我先许说者，今已说竟。

二者，三藏、摩河衍外，更有经名一目多迦；目多迦名出三藏及摩河衍。净饭王强令族人出家作佛弟子，佛选择五百人堪任得道者，将至舍婆提；所以者何？以其未离欲，若近亲里，恐其破戒，故将至舍婆提。令舍利弗、目犍连等教化之，初夜、后夜，专精不睡，勤修精进，故得道；得道已，佛还将至本生国。

一切诸佛法，还本国时，与大会诸天众俱住迦毘罗婆仙人林中。

此林去迦毘罗婆城五十里，是诸释游戏园。

此诸释子比丘，处舍婆提时，初夜、后夜，专精不睡，故以夜为长；

从林中来，入城乞食，觉道里长远。

例：尔时，佛知其心，有一师子来礼佛足，在一面住，

佛以是三因缘，故说偈：不寐夜长，疲倦道长，愚生死长，莫知正法！

佛告比丘：

你等未出家时，其心放逸多睡眠故，不觉夜长；

今初夜、后夜，专精求道，减省睡眠故，觉夜大长。

此迦毘罗婆林，汝本驾乘游戏，不觉为远；

今着衣持钵，步行疲极，故觉道长。

是师子，毘婆尸佛时作婆罗门师，见佛说法，来至佛所。

尔时，大众以听法故，无共语者，即生恶念，发恶骂言：

此诸秃辈，与畜生何异！不别好人，不知言语！

以是恶口业故，从毘婆尸佛乃至今日，九十一劫，常堕畜生中；

此人尔时，即应得道，以愚痴故，自作生死长久；

今于佛所心清净故，当得解脱。

如是等经，名为出因缘。于何处出？于三藏、摩诃衍中出，故名为出。

云何名因缘？是三事之本，名为因缘经。

## 9、本生经者，

例：昔者菩萨曾为师子，在林中住，与一猕猴共为亲友。

猕猴以二子寄于师子，

时有鸷鸟，饥行求食，值师子睡，故取猴子而去，住于树上。

师子觉已，求猴子不得见，鸢持在树上，而告鸢言：

「我受猕猴寄托二子，护之不谨，令汝得去，孤负言信，请从汝索；

我为兽中之王，汝为鸟中之主，贵势同等，宜以相还！」

鸢言：「汝不知时，吾今饥乏，何论同异！」

师子知其叵得，自以利爪掴其肋肉，以贸猴子。

例：又过去世时，人民多病黄白痿热；

菩萨尔时，身为赤鱼，自以其肉施诸病人，以救其疾。

例：又昔菩萨作一鸟身，在林中住，见有一人入于深水非人行处，为水神所罾。

水神罾法，着不可解；鸟知解法，至香山中取一药草，着其罾上，绳即烂坏，人得

脱去。

如是等无量本生，多有所济，是名本生经。

10、方广经者，名摩诃衍，

所谓《般若波罗蜜经》、《六波罗蜜经》、《华严经》、《法华经》。

如是等无量阿僧祇诸经，为得阿耨多罗三藐三菩提故说。

11、未曾有经：如佛现种种神力，众生怪未曾有，

所谓佛生时，身放大光明，照三千大千世界及幽暗之处，复照十方无量诸佛三千大千世界。

是时于佛母前，有清净好池，以浴菩萨；

梵王执盖，帝释洗身，二龙吐水。

生时，不须扶持而行七步，足迹之处，皆有莲华，而发是言：

我是度一切众生老、病、死者！

地大震动，天雨众花，树出音声，作天伎乐。

如是等无量希有事，是名未曾有经。

12、论议经者，答诸问者，释其所以。又复广说诸义。

如佛说四谛，何等是四？所谓四圣谛。何等是四？所谓苦、集、灭、道圣谛。

是名论议。

何等为苦圣谛？所谓生苦等八种苦。

何等是生苦？所谓诸众生各各生处，是中受苦。

如是等问答，广解其义，是名优波提舍。

如摩诃衍中，佛说六波罗蜜。何等六？所谓檀波罗蜜乃至般若波罗蜜。

何等是檀波罗蜜？檀波罗蜜有二种：一者、具足，二者、不具足。

何等是具足？与般若波罗蜜和合，乃至十住菩萨所得，是名具足。

不具足者，初发菩萨心，未得无生忍法，未与般若波罗蜜和合，是名不具足。

乃至禅波罗蜜，亦如是。

般若波罗蜜具足者，有方便力；未具足者，无方便力。

佛所说论议经，及摩诃迦梅延所解修多罗，乃至像法凡夫人如法说者，亦名优波提舍。

声闻所不闻者，佛独与菩萨说法，无诸声闻听者。

又佛以神通力，变身无数，遍至十方一乘世界说法。

又复佛为欲天、色天说法，无诸弟子，故不得闻。

诸六通阿罗汉，若佛说时，虽不在坐，以天耳、天眼可得见闻，若以宿命通并知过去事，何以不闻？

a、诸声闻神通力所不及处，是故不闻。

b、佛为诸大菩萨说《不可思议解脱经》，舍利弗、目连在佛左右而不得闻，以不种是闻大乘行法因缘故。

譬如坐禅人，入一切处定中，能使一切皆水皆火，而余人不见。

尽欲受持者，闻而奉行为受；久久不失为持。

四十八、菩萨摩訶萨，十方如恒河沙等世界中诸佛所说法：已说、今说、当说，闻已，

欲一切信持、自行、亦为人说者，当学般若波罗蜜。

1、上说欲忆持十方诸佛法，未知是何法，故说十二部经是佛法及声闻所不闻者。

2、上言恒河沙等世界诸佛；今言恒河沙三世诸佛法。

3、上但说受持不忘，不说受持利益；今自为，亦为他人说，故说。

四十九、菩萨摩訶萨，过去诸佛说已，未来诸佛当说，欲闻，闻已，自利亦利他人，当

学般若波罗蜜。

十方现在佛所说法，可受、可持；过去已灭，未来未有，云何可闻？

1、菩萨有三昧，名观三世诸佛三昧；

菩萨人是三昧中，悉见三世诸佛，闻其说法。

譬如外道神仙，于未来世事，未有形兆、未有言说，以智慧力故，亦见亦闻。

2、诸菩萨力不可思议，未来世虽未有形、未有言说，而能见能闻。

3、或以陀罗尼力。

4、或以今事比知过去、未来诸事。

故言欲得是者，当学般若波罗蜜。

五十、十方如恒河沙等诸世界，中间暗处，日月所不照，欲持光明普照者，当学般若波罗蜜。

1、菩萨从兜率天上欲降神母胎，尔时，身放光明，遍照一切世界，及世间幽冥之处。

2、次后生时，光明遍照，亦复如是。

3、初成道时、转法轮时、般涅槃时，放大光明，皆亦如是。

及于余时现大神通，放大光明。

4、如欲说般若波罗蜜时，现大神通，以大光明，遍照世间幽冥之处。

5、诸大菩萨能有是力。如普贤菩萨，观世音、得大势、明网、无量光菩萨等，能有是力，身出无量光明，能照十方如恒河沙等世界。

6、又如阿弥陀佛世界中，诸菩萨身出常光，照十方由旬。

菩萨身光如是，本以何业因缘得？身业清净故身得庄严。

经说：有一鬼头似猪，臭虫从口出，身有金色光明。

是鬼宿世作比丘，恶口骂詈客比丘。

身持净戒，故身有光明；口有恶言，故臭虫从口出。

经说：心清净优劣，故光有上、中、下：少光、大光、光音。

欲界诸天，心清净布施、持戒，故身有光明。

7、有人怜愍众生故，于暗处燃灯，亦为供养尊像、塔、寺故，亦以明珠、户向、明镜等明净物布施故，身有光明。

8、常修慈心，遍念众生，心清净故。

9、常修念佛三昧，念诸佛光明神德故，得身光明。

10、行者常修火一切入；

11、以智慧光明，教化愚暗邪见众生。

以是业因缘故，得心中智慧明，身亦有光。

如是等业因缘，得身光清净。

五十一、十方如恒河沙等世界中，无有佛名、法名、僧名；

欲使一切众生皆得正见、闻三宝音者，当学般若波罗蜜。

1、菩萨于先无佛法塔寺处，于中起塔；以是业因缘，后身得力成就；

2、于无佛法众处，赞叹三宝，令众生入于正见。

经说：有人于先无佛塔国土中，修立塔庙，得梵福德，梵名无量福德；以是因缘，疾得禅定；得禅定故，得无量神通；神通力故，能到十方赞叹三宝。

3、正见者，若先不识三宝功德，因菩萨故得信三宝；信三宝故，信业因缘罪福；

信业因缘故，信世间是缚、涅槃是解。

五十二、菩萨摩訶萨，欲令十方如恒河沙等世界中众生，以我力故，盲者得视、

聋者得听、狂者得念、裸者得衣、饥渴者得饱满者，当学般若波罗蜜。

1、菩萨行无碍般若波罗蜜，若得无碍解脱成佛、

若作法性生身菩萨，如文殊师利等，在十住地，有种种功德具足；

众生见者，皆得如愿。譬如如意珠，所欲皆得。

法性生身佛及法性生身菩萨，人有见者，皆得所愿，亦复如是。

2、菩萨从初发意已来，于无量劫中，治一切众生九十六种眼病；

又于无量世中，自以眼布施众生；

又智慧光明，破邪见黑暗；

又以大悲，欲令众生所愿皆得。

如是业因缘，令众生见菩萨身而不得眼，

余事亦如是。

五十三、菩萨摩訶萨，若欲令十方如恒沙等世界中众生，诸在三恶趣者，以我力故皆得

人身者，当学般若波罗蜜。

1、众生自以善业因缘故得人身，菩萨则以恩力因缘故令得人身；

2、菩萨以神通变化说法力故，令众生修善得人身。

经说：二因缘，发起正见：一者、外闻正法，二者、内有正念。

又如草木，内有种子、外有雨泽，然后得生。

若无菩萨，众生虽有业因缘，无由发起。

故知：诸佛菩萨，所益甚多！

3、诸佛及大菩萨身遍出无量光明，从是光明出无量化身，遍入十方三恶道中，令地狱火灭汤冷，其中众生心清净故，生天上、人中；令饿鬼道饥渴饱满，开发善心，得生天、人中；令畜生道随意得食，离诸恐怖，开发善心，亦得生天、人中。如是名为一切三恶道得解脱。

4、于人中得修大功德，亦受福乐；天上多着乐故，不能修道。

以是故愿令皆得人身。

5、菩萨不愿众生但受福乐，欲令得解脱，常乐涅槃。以是故不说生天上。

五十四、欲令十方如恒河沙等世界中众生，以我力故，立于戒、三昧、智慧、解脱、解

脱知见，令得须陀洹果，乃至阿耨多罗三藐三菩提者，当学般若波罗蜜。

上说但是声闻法，从须陀洹乃至无余涅槃；

今杂说三乘：声闻、辟支佛，乃至阿耨多罗三藐三菩提。

五十五、菩萨摩訶萨欲学诸佛威仪者，当学般若波罗蜜。

1、何等是诸佛威仪？

威仪名身四动止，行、住、坐、卧。

譬如象王，回身而观；行时足离地四指，虽不蹈地而轮迹现；

不迟不疾，身不倾动；常举右手安慰众生；结加趺坐，其身正直；

常偃右肋，累膝而卧；所敷草蓐，齐整不乱；食不着味，美恶等一；

若受人请，默然无违；言辞柔软，方便利益，不失时节。

2、法身佛威仪者，过东方如恒河沙等世界以为一步；梵音说法，亦复如是。

五十六、菩萨摩訶萨欲得如象王视观者，当学般若波罗蜜。

五十七、菩萨作是愿：使我行时离地四指，足不蹈地。我当共四天王天，乃至阿迦尼咤

天、无量千万亿诸天众围绕恭敬，至菩提树下者，当学般若波罗蜜。

1、如象王视者，若欲回身观时，举身俱转。

a、大人相者，身心专一；是故若有所观，身、心俱回。

譬如师子有所搏撮，不以小物故而改其壮势。

b、佛亦如是，若有所观、若有所说，身与心俱，常不散。所以者何？

从无数劫来，集一心法；以是业因缘故，顶骨与身为一，无有分解。

c、又以世世破憍慢故，不轻众生，观则俱转。

经说：舍婆提国除粪人，而佛以手摩头，教令出家，犹不轻之。

2、足离地四指者，

佛若常飞，众生疑怪，谓佛非是人类，则不归附；

若足到地，则众生以为与常人不异，不生敬心。

是故虽为行地，四指不到而轮迹现。

3、如佛常放丈光，足不到地，众生何以故不尽敬附？

a、众生无量劫中积罪甚重，无明垢深，于佛生疑，谓是幻师，以术诳人；或言：足不蹈地，生性自尔，如鸟能飞，有何奇特！

b、或有众生罪重因缘故，不见佛相，直谓大威德沙门而已；

譬如人重病欲死，名药美食，皆谓臭秽。是故不尽敬附。

4、共四天王，乃至阿迦尼咤、无量千万亿诸天众恭敬围绕，至菩提树下者，是诸佛常法。

a、佛为世尊，至菩提树下，欲破二种魔：一者、结使魔，二者、自在天子魔。

欲成一切智，故诸天众恭敬侍送。

b、又诸天世世佐助拥护菩萨，乃至出家时，令诸宫人嫖女，昏睡而卧，捧马足踰城出。今日事办，我等当共侍送至菩提树下。

c、佛独于深林中求菩提树，非是人行处，是故不说。

d、又以人无天眼、他心智故，不知佛当成道，是故不说。

e、诸天贵于人，故但说天。

f、诸佛常乐闲静处，诸天能隐身不现，不妨闲静，是故但说诸天从。

g、菩萨见五比丘舍菩萨而去，而菩萨独至树下，是故作是愿。

五十八、我当于菩提树下坐，四天王天乃至阿迦尼咤天，以天衣为座者，当学般若波罗

蜜。

1、声闻经中说敷草。

摩诃衍经中随众生福德多少，所见不同，或有见敷草树下，或见敷天窠。

生身佛把草树下；

法性生身佛以天衣为座，或胜天衣。

佛于深林树下成佛，林中人见，则奉佛草。

若贵人见者，当以所贵衣服为座；

但林中无贵人故，时诸龙神天，各以妙衣为座。

四天王衣重二两；忉利天衣重一两；夜摩天衣重十八铢；兜率天衣重十二铢；

化乐天衣重六铢；他化自在天衣重三铢。

色界天衣无重相。

欲界天衣从树边生，无缕无织；譬如薄冰，光曜明净，有种种色。

色界天衣，纯金色光明，不可称知。

如是等宝衣敷座，菩萨坐上，成阿耨多罗三藐三菩提。

2、诸菩萨等，见佛将成道时，皆为佛敷座。

或广长一由旬，十百千万亿乃至无量由旬；高亦如是。

此诸宝座，是菩萨无漏福德生故，是诸天目所不见，何况手触！

3、般若波罗蜜有二种：

一者、与声闻、菩萨、诸天共说；

二者、但与十住具足菩萨说。

是般若波罗蜜中，应说菩萨为佛敷座。所以者何？

诸天知佛恩，不及一生、二生诸大菩萨，如是菩萨以神通力而供养佛。

五十九、我得阿耨多罗三藐三菩提时，行、住、坐、卧处，欲使悉为金刚者，当学般若

波罗蜜。

为何佛四威仪中，地悉为金刚？

1、菩萨至菩提树下时，于此处坐，得阿耨多罗三藐三菩提；尔时菩萨入诸法实相中，无有地能举是菩萨。所以者何？

地皆是众生虚诳业因缘报故有，是故不能举。

2、菩萨欲成佛时，实相智慧身，是时坐处变为金刚。

土在金轮上，金轮在金刚上，从金刚际出，如莲花台，直上持菩萨坐处，令不陷没；以是故，此道场坐处名为金刚。

3、成佛道已，四种威仪处，悉变成金刚。

4、金刚虽是虚诳所成，于地最为牢固，更无胜者。

金刚下水，诸大龙王以此坚固物，奉献于佛。

5、亦是佛宿世业因缘故，得此安立处。

6、佛变金刚及四大令为虚空，虚空不诳，

佛智慧亦不诳；一事既同，是故能举。

六十、菩萨摩訶萨，欲出家日即成阿耨多罗三藐三菩提；即是日转法轮。

转法轮时，无量阿僧祇众生远尘离垢，诸法中得法眼净；

无量阿僧祇众生，一切法不受故，诸漏心得解脱；

无量阿僧祇众生，于阿耨多罗三藐三菩提得不退转者，当学般若波罗蜜。

1、或有菩萨，于恶世邪见众生中，为除众生邪见故，自行勤苦甚难之行。

如释迦文佛于沓楼频螺树林中，食一麻一米。

诸外道言：我等先师，虽修苦行，不能如是六年勤苦！

2、有人谓佛先世恶业，今受苦报。

有菩萨谓佛为实受是苦。是故发心：我当即以出家日成佛。

3、有菩萨于好世出家，如：大通惠求佛道，结加趺坐，经十小劫乃得成佛。

菩萨闻是已，发心言：愿我以出家日即得成佛。

4、有菩萨成佛已，不即转法轮。

如燃灯佛，成佛已，十二年但放光明，人无识者，而不说法。

又如须扇多佛，成佛已，无受化者，作化佛留住一劫，说法度人，自身灭度。

又如释迦文佛，成佛已，五十七日不说法。

菩萨闻是已，愿我成佛已，即转法轮。

5、有佛度众生有限数。

如释迦文佛，转法轮时，僑陈如一人得初道，八万诸天诸法中得法眼净。

菩萨闻是已，作是愿：我转法轮时，令无量阿僧祇人，远尘离垢，诸法中得法眼净。

以释迦文佛初转法轮时，一比丘及诸天，皆得初道；而无人得阿罗汉及菩萨道者；

是故菩萨愿言：我作佛时，当使无量阿僧祇众生，一切法不受故，诸漏心得解脱；

及无量阿僧祇众生，于阿耨多罗三藐三菩提得不退转。

6、一佛能变作无量阿僧祇身而度众生，而世界有严净者、有不严净者。

菩萨若见、若闻：

是诸佛有苦行难得佛者；有不即转法轮者；有如释迦牟尼佛，六年苦行成道。

又闻：初转法轮时，未有得阿罗汉道者，何况得菩萨道！

是故菩萨未闻诸佛力等，故作是愿。

7、然诸佛神力、功德，平等无异。

六十一、我得阿耨多罗三藐三菩提时，以无量阿僧祇声闻为僧；我一说法时，便于座上

尽得阿罗汉者，当学般若波罗蜜。

1、有佛以声闻为僧，有数有限。

如释迦文尼佛，千二百五十比丘为僧。

弥勒佛，初会僧九十九亿，第二会九十六亿，第三会九十三亿。

如是等诸佛僧，各各有限有数不同。

以是故，菩萨愿言：我当以无量阿僧祇声闻为僧。

2、有佛为众生说法，一说法得初道，异时更说，得二道、三道、第四道。

释迦文尼佛，为五比丘说法，得初道，异日得阿罗汉道；

舍利弗得初道，经半月然后得阿罗汉道；

摩诃迦叶见佛得初道，过八日已得阿罗汉；

阿难得须陀洹道，二十五岁供养佛已，佛般涅槃后得阿罗汉。

如是等诸阿罗汉，不一时得四道。

以是故菩萨愿言：我一说法时，便于座上尽得阿罗汉。

六十二、我当以无量阿僧祇菩萨摩訶萨为僧；

我一说法时，无量阿僧祇菩萨，皆得阿鞞跋致。

1、菩萨所以作此愿者。

a、诸佛多以声闻为僧，无别菩萨僧。

以释迦文佛无别菩萨僧，故弥勒菩萨、文殊师利菩萨等入声闻僧中次第坐。

b、有佛为一乘说法，纯以菩萨为僧。

c、有佛声闻、菩萨杂以为僧；如阿弥陀佛国，菩萨僧多，声闻僧少。

以是故，愿以无量菩萨为僧。

2、有佛初转法轮时，无有人得阿鞞跋致。

以是故，菩萨愿言：我一说法，无量阿僧祇人得阿鞞跋致。

六十三、欲得寿命无量、光明具足者，当学般若波罗蜜。

1、a、诸佛寿命，有长、有短。

毘婆尸佛，寿八万四千岁；拘留孙佛，寿六万岁；迦那含牟尼佛，寿三万岁；

迦叶佛，寿二万岁；释迦文佛，寿百岁，少有过者；弥勒佛，寿八万四千岁。

b、释迦文佛常光一丈；弥勒佛常光十里。

2、诸佛寿命、光明，各有二种：

一者、隐藏，二者、显现；

一者、真实，二者、为众生故隐藏。

真实者，无量、显现；

为众生者，有限有量。

3、实佛寿不应短，所以者何？诸佛长寿业因缘具足故。

如婆伽梵宿世救一聚落人命，故得无量阿僧祇寿命。

梵世中寿法不过半劫；而此梵天寿独无量，故生邪见言：唯我常住。

佛到其所，破其邪见，说其本缘救一聚落，故寿乃尔。

a、何况佛世世救无量阿僧祇众生：或以财物救济，或以身命代死，

云何寿限不过百岁！

b、又不杀生戒，是长寿业因缘；

佛以大慈众生，爱彻骨髓，常能为众生故死，何况杀生！

c、又以诸法实相智慧，真实不诳故，亦是长寿因缘；

菩萨以般若波罗蜜和合持戒诸功德故，得寿命无量，

何况佛世世具足此诸无量功德而寿命有限！

d、如一切色中，佛身第一；一切心中，佛心第一；

以是故，一切寿命中，佛寿亦应第一。

如世俗人言：人生于世，以寿为贵；

佛为人中之上，寿亦应长！

4、佛虽有长寿业因缘，生于恶世故寿命便短；

a、以此短寿，能具佛事，何用长为？

b、又佛以神通力故，一日之中能具佛事，何况百岁！

c、此间阎浮提恶，故佛寿应短。

5、余处好，故佛寿应长。

余处阎浮提，佛各言我是实佛，余处为变化。

若余处国土众生，知是化佛，则不肯信受教戒。

又如余国土人，寿命一劫，若佛寿百岁，于彼裁无一日，众生则起轻慢，不肯受教；彼则以一劫为实佛，以此处为变化佛。

首楞严三昧经说：神通遍照佛，寿七百亿阿僧祇劫。

佛告文殊师利：彼佛则是我身。彼佛亦言：释迦文佛则是我身。

6、故知诸佛寿命，实皆无量；为度人故，现有长、短。

释迦文佛，以神通力故，所度众生与人寿不异者，则不须百岁，一日之中可具足佛事！

阿难一时心生是念：

如燃灯世尊、一切胜佛、毘婆尸佛，出于好世，寿命极多，能具佛事；

我释迦文佛出生恶世，寿命极短，将无世尊不能具足佛事耶？

尔时，世尊入日出三昧，从身变化，出无量诸佛及无量光明，普至十方；

一一化佛在诸世界，各作佛事：或有说法、或现神通、或现三昧、或现饭食。

如是之比种种因缘，施作佛事而度众生。

从三昧起，告阿难：你悉见闻是事不？

阿难言：已见！

佛告阿难：佛以如是神力，能具佛事不？

阿难言：假令佛寿一日，大地草木悉为可度众生，则能度尽，何况百岁！

以是故知：诸佛寿命，皆悉无量；为度人故，现有长、短。

譬如日出，影现于水，随水大小，水大则影久，水小则速灭；

若照琉璃、颇梨珠山，影则久住。

如火烧草木，燃少则速灭，燃多则久住；不可以灭处无火故，谓多燃处亦无。

7、光明长、短义，亦如是。

六十四、我成阿耨多罗三藐三菩提时，世界中无有淫欲、瞋恚、愚痴，亦无三毒之名。

一切众生成就如是智慧，善施、善戒、善定、善梵行、善不烧众生者，当学般

若波罗蜜。

1、若世界无三毒、亦无三毒名者，佛为何故出生其国？

贪欲、瞋恚、愚痴名为三不善根，是欲界系法。

佛若说贪欲、瞋恚、愚痴，是欲界系不善。

若说染爱、无明是则通三界。

有佛世界纯诸欲人，为是众生故，菩萨愿言：我成佛时，国无三毒及三毒之名。

2、有清净佛国，纯阿鞞跋致、法性生身菩萨，无诸烦恼，唯有余习，故言无三毒之名。

如菩萨愿言：我当度一切众生，而众生实不尽度；

此亦如是，欲令世界无三毒之名，亦应实有三毒不尽。

若无三毒，何用佛为？如地无大暗，则不须日照。

如经说：若无三法则佛不出世。若三法不断则不得离老、病、死。

「三法」者则是三毒。

3、有世界，众生分别诸法是善、是不善、是缚、是解等，于一相寂灭法中而生戏论。是故菩萨愿言：令我世界中众生不生三毒；知三毒实相即是涅槃。

4、一切众生得如是智慧，是何等智慧？

智慧是世间正见。

世间正见中，说有布施、有罪福、有今世后世、有阿罗汉。

信罪福故，能善布施。

信有阿罗汉故，能善持戒、善禅定、善梵行。

得正见力故，能善不烧众生。

世间正见是无漏智慧根本。

故说国中无三毒之名。

5、贪欲有二种：一者、邪贪欲，二者、贪欲。

瞋恚有二种：一者、邪瞋恚，二者、瞋恚。

愚痴有二种：一者、邪见愚痴，二者、愚痴。

是三种邪毒众生难可化度；余三易度。

无三毒名者：无邪三毒之名。

六十五、使我般涅槃后，法无灭尽，亦无灭尽之名，当学般若波罗蜜。

1、是菩萨愿事，不必是实。

一切有为法，从因缘和合生，云何常住而不灭？

佛如日明，法如日没余光，云何日没而余光不灭？

但久住故无能见灭者，故名不灭。

是菩萨见诸佛法住有多有少。

如迦叶佛法住七日；

如释迦牟尼佛法住千岁。

是故菩萨发愿言：法虽有为，愿令相续不灭，如火得薪，相传不绝。

2、诸法实相名为佛法。

是实法相，不生不灭、不断不常、不一不异、不来不去、不受不动、不着不依、无

所有，如涅槃相。法相如是，云何有灭？

法相如是者，一切佛法皆应不灭！

如所言，诸法实相无有灭者。

有人忆想分别取诸法相、坏实法相，用二法说是故有灭。

实相法中无有灭。

3、行般若波罗蜜无碍法、集无量功德故，随其本愿，法法相续，无有见其灭者；

譬如仰射虚空，箭去极远，人虽不见，要必当堕。

六十六、我得阿耨多罗三藐三菩提时，十方如恒河沙等世界中众生闻我名者，必得阿耨

多罗三藐三菩提。欲得如是等功德者，当学般若波罗蜜。

1、有二种佛：一者、法性生身佛，二者、随众生优劣现化佛。

a、为法性生身佛故，说乃至闻名得度；

b、为随众生现身佛故，说虽共佛住，随业因缘有堕地狱者。

a、法性生身佛者，无事不济、无愿不满。所以者何？

于无量阿僧祇劫积集一切善本功德，一切智慧无碍具足，为众圣主，

诸天及大菩萨希能见者。

譬如如意宝珠难见、难得，若有见者，所愿必果。

如喜见药，其有见者，众患悉除。

如转轮圣王，人有见者，无不富足。

如释提桓因，有人见者，随愿悉得。

如梵天王，众生依附，恐怖悉除。

如人念观世音菩萨名者，悉脱厄难。

是事尚尔，何况诸佛法性生身！

1、释迦文佛亦是法性生身分，无有异体；

何以故佛在世时，有作五逆罪人、饥饿、贼盗如是等恶？

a、释迦文佛本誓：我出恶世，欲以道法度脱众生，不为富贵世乐故出。

若佛以力与之则无事不能。

b、又亦是众生福德力薄、罪垢深重故，不得随意度脱。

c、又今佛但说清净涅槃，

而众生讥论诽谤言：何以多畜弟子化导人民？此亦是系缚法。

但以涅槃法化犹尚讥谤，何况杂以世乐！

提婆达多欲令足下有千辐相轮，故以铁作模烧而炼，炼已，足坏，身恼大呼。

尔时阿难闻已，涕泣白佛：我兄欲死，愿佛哀救！

佛即伸手就摩其身，发至诚言：我看罗睺罗与提婆达多等者，彼痛当灭。是时提婆达多众痛即除；执手观之，知是佛手，便作是言：

净饭王子以此医术，足自生活。

佛告阿难：你观提婆达多否？用心如是，云何可度？

若好世人则无是咎。

如是众生，若以世乐，不得度。

是故说闻佛名有得道者，有不得者。

### 3、佛身无量阿僧祇种种不同：

有佛为众生说法令得道者。

有佛放无量光明，众生遇之而得道者。

有以神通变化指示其心而得道者。

有佛但现色身而得道者。

有佛遍身毛孔出众妙香，众生闻之而得道者。

有佛以食与众生令得道者。

有佛众生但念而得道者。

有佛能以一切草木之声而作佛事令众生得道者。

有佛众生闻名而得道者。

为是佛故说言：我作佛时，其闻名者，皆令得度。

4、闻名，不但以名便得道；闻已修道，然后得度。

如须达长者，初闻佛名，内心惊喜，诣佛听法而能得道。

又如世夷罗婆罗门，从鸡泥耶结发梵志所初闻佛名，心即惊喜，直诣佛所闻法得道。

是但说闻名：闻名为得道因缘，非得道。

譬如经中说：修慈心时，即修七觉意。

从慈起已，即修七觉，更无余法，故言即时。

即时有二种：一者、同时，二者、虽久更无异法。

即是心而得修七觉意，亦名即时。

5、有众生福德淳熟、结使心薄，应当得道，若闻佛名，即时得道。

6、又复以佛威力故，闻即得度。

譬如熟痛，若无治者，得小因缘而便自溃。

亦如熟果，若人无取，微风因缘，便自堕落。

譬如新净白叠，易为受色。

为是人故，说若闻佛名即时得道。

譬如鬼神着人，闻仙人咒名，即时舍去。

7、过如恒河沙等世界，谁传此名，令彼得闻？

a、佛以神力举身毛孔放无量光明，一一光上皆有宝华，一一华上皆有坐佛，

一一诸佛各说妙法以度众生，又说诸佛名字，以是故闻。

b、诸大菩萨以本愿欲至无佛法处称扬佛名，是故得闻。

c、复有大功德人从虚空中闻佛名号，如萨陀波仑菩萨。

d、又有从诸天闻。

e、或从树木音声中闻。

f、或从梦中。

g、诸佛有不可思议力故自往语，或以声告。

h、又如菩萨作愿誓度一切众生。

以是故说：我成佛时，过如恒河沙等世界众生闻我名皆得成佛。

欲得是者，当学般若波罗蜜。

总结：

般若波罗蜜功德无量无边，

学般若波罗蜜，能得如上诸功德及诸所愿。

般若波罗蜜是诸佛母，父母之中，母功最重，

是故佛以般若为母，般舟三昧为父。

1、三昧唯能摄持乱心，令智慧得成，而不能观诸法实相。

般若波罗蜜能遍观诸法分别实相，无事不达、无事不成；

功德大故，名之为母。

以是故，行者行六波罗蜜及种种功德和合，能具众愿，

而但说当学般若波罗蜜。

2、故说：若无般若波罗蜜，余五事不名波罗蜜。

虽普修众行，亦不能满具诸愿。如种种画彩，若无胶者，亦不中用。

3、众生从无始世界中来，虽修布施、持戒、忍辱、精进、一心、智慧，受世间果报已而复还尽。所以者何？离般若波罗蜜故。

4、今以佛恩，以般若波罗蜜修行六事，故得名波罗蜜，成就佛道，使佛佛相续而无穷尽。

5、菩萨行般若波罗蜜时，普观诸法皆空，空亦复空，灭诸观，得无碍般若波罗蜜，以大悲方便力还起诸功德业。此清净业因缘故，无愿不得。

6、余功德离般若波罗蜜，无有无碍智慧，

故言：欲得诸功德及愿，当学般若波罗蜜。

又以五波罗蜜离般若，不得波罗蜜名字；

五波罗蜜如盲，般若波罗蜜如眼；

五波罗蜜如坏瓶盛水，般若波罗蜜如盛熟瓶；

五波罗蜜如鸟无两翼，般若波罗蜜如有翼之鸟。  
如是等种种因缘故，般若波罗蜜能成大事。  
故言：欲得诸功德及愿，当学般若波罗蜜。

## 离苦得乐的妙法单元系列

第一册	佛教徒的福利 我到底在怕什么 我到底在爱什么 我到底在忙什么 人生最困难的是什么 如何改变命运
第二册	人生苦短，何去何从~佛教徒的生命观 打开心眼，开拓视野~佛教的宇宙观 生死之间明明白白 无价的宝藏~缘起正法 最幸福的人 智者的抉择~见佛闻法
第三册	布施 持戒
第四册	生天之论 欲不净法，漏为大患，出离为要 出家真好
第五册	认清自己 我到底是哪一种人 为何生为女人 阎罗王也想出家求解脱 我应该追求什么 不二过
第六册	苦圣谛 集圣谛 灭圣谛
第七册	道圣谛 四圣谛总结

## 无上菩提单元系列

第一册	菩提大道，你我同行 护持正法，发无上心 见佛相好，发菩提心 观佛功德，发菩提心 报四重恩，发菩提心 大悲有情，发菩提心 无价宝珠妙无穷~无上菩提心
第二册	深入经藏，你我同行 般若经的三假 天台宗三假 中论的空 般若十八空 遍学一切法 大誓庄严，你我同行
第三册	檀那波罗蜜 尸罗波罗蜜 羼提波罗蜜 毗梨耶波罗蜜
第四册	禅那波罗蜜 般若波罗蜜 菩萨何去何从 菩萨应知 发趣大乘，你我同行
第五册	具足十地 乘于大乘，你我同行 般若波罗蜜的功德（第六册） 何处是儿家 回家真好

感恩成就暨助印流通本书的护法菩萨们

## 回向偈

愿以此功德

庄严佛净土

上报四重恩

下济三途苦

若有见闻者

悉发菩提心

尽此一报身

同生极乐国

# 无上菩提 (六)

出版者 / 释大势

编辑 / 妙有菩提园 法宝编辑组

通讯处 / 中华民国台湾 540 南投市八卦路 292 巷 26 号

电话 / 886-49-2291838

传真 / 886-49-2291848

法宝结缘专线 / 886-933-523972 陈居士

886-986-207788 刘居士

E - m a i l / nothing.mail@msa.hinet.net

新加坡网址 / www.mypty.sg

新加坡 / 净觉居士 (65) 97879508

妙严居士 (65) 97213072

中国 / 梁居士 (86) 13560799426

茹居士 (86) 15103460179

马来西亚 / 叶居士 0128300021

出版日期 / 2014 年 5 月初版



妙有菩提園

结缘品

免费结缘，欢迎随喜护持助印，  
利益大众，功德无量。

本园一切法宝、免费结缘、绝无托人义卖募款，敬请明察。